

湘軍記

353.09
S1053

湘軍記卷十七

東湖王定安撰

平回上篇

回之興肇於隋其教曰天方師曰穆罕默德

一曰摩訶末
一曰馬哈麻

皆譯語
轉音也

大食國人大食在漢曰條支魏曰波斯東西俱距

紅海范書謂條支土地暑溼臨西海三面路絕是矣其先
與西洋天主教同出一源相傳世統起於阿丹所謂始生
人祖者也歷十代而至弩海當中國洪水之世又十代而
至易卜臘欣生二子曰易司馬儀曰易司哈格易司哈格

傳三十一代而至耶蘇是爲天主教祖易司馬儀傳二十
八代而至穆罕默德是爲天方教祖耶蘇生漢哀帝時穆
罕默德生梁中大同元年後六百年而世族反出其上外
族紀載慌忽不可考也穆罕默德生而神異見佛像不拜
弱冠從其叔父賈於沙牧以牧駝爲業沙牧者耶蘇故里
也一日憩古樹下天主教人詢其姓氏愕曰昔耶蘇遺言
六百年後有聖人坐此今果驗矣穆罕默德私自喜年二
十五娶於赫底徹氏赫底徹者墨克故君之女饒於貲年
已四十矣穆罕默德居室若有光乃棄世事日往候獵山

唐書曰地那山創立新教忽聞途中呼聲大恐趨至洞復聞誦經

聲歸語其妻妻曰是道成之徵也亟散財以贍貧者於是

自謂授天經大旨以萬物非主惟有真主真主命穆罕默

德興教制禮順之者登天堂逆之者墮地獄墨克人皆詆

爲誕發兵捕之率其徒十二人奔默狄那默狄那擁立爲

王時隋開皇十九年回回歷所稱阿喇必年者也一曰阿爾壁年

猶言爲聖元年也有獸言於郊曰天使來西域諸國咸朝貢尊爲

別諳拔爾譯言天使乃哀亡命於怛曷水劫商旅貲貨以自益

墨克人往討敗還遂乘勝滅波斯破拂菻南侵波羅門併

諸胡國地廣萬里東距突騎斯西南際海勝兵四十萬康石皆往臣之是時西北諸胡多奉天方教回紇其一也回紇本匈奴俗而白帽事天奉摩尼爲師與天方同中國距天方遠見白帽者輒以回紇概之回回之名自此起大業

中穆罕默德遣其徒撒哈八

卽蘇哈巴

撒阿的

卽賽爾的

幹葛思

卽幹

歌入中國建懷聖寺於番州

今廣東廣州府

是爲天方教東來之

始唐肅宗時回紇助收兩京留戰兵於沙苑沙苑在同州

馮翊縣南二十里宜六畜回紇騎兵多故令屯此養馬杜

甫留花門詩曰連雲屯左輔百里見積雪

樓大防云回紇衣冠皆白故此

之積雪。沙苑臨清渭。泉香草豐潔。花門旣須留。原野轉蕭瑟。

正詠其事。是爲回回留陝西之始。武宗會昌元年。黠戛斯破回鶻。誅可汗。殘部入雲朔。掠幽州。節度使張仲武大破之。降回部三萬眾。詔配諸道。其後回益衰。散居甘州。有磧西諸城。懿宗時。其酋擊吐番。盡取西州輪台地。自五代訖宋。甘涼瓜沙皆有回鶻族。帳隴西回部於斯眾矣。宋徽宗宣和中。回鶻因入貢。散處陝西諸州。爲商賈。久不歸。詔禁之。而不能止。其種人漸居秦川。爲熟戶。元太祖先定西域。回部內屬。世祖奄有中夏。設回回司天監。以測星度。於是

考試科第則設回回國子學選用醫藥則設回回藥物院
製造軍礮則設回回軍匠萬戶府而各省參知政事必以
回回一員充之其各道廉訪司各部達魯噶齊及江南州
郡皆以回回與蒙古漢人參用而內職如中書省宣政院
暨六部皆有回回掾史書寫若干人外則河南江北暨江
浙湖廣四川陝西甘肅遼陽嶺北雲南諸行省皆有回回
掾史通事知印若干人中國回族之盛至此極矣明沿元
制回回居內地者儕之齊民

國初廣州甘肅回弁皆擁明裔梗

主命自居殷頑

大兵旋破平之。乾隆中戡定回疆，設官分守西域。年班入覲者相望於道。是時循化廳回馬明心始創新教，其徒蘇四十三讎殺老教百餘人。老教經皆默誦，新教則朗誦之。於教典無關，出入回族愚獷，至以此相戕，可憫也已。蘇四十三既誅。

詔移西安提督於固原，移固原總兵於河州，以控回民。未幾，廣西巡撫朱椿獲回民海富潤，搜其回經數十卷，疑爲蘇逆餘黨，名捕著書作序及贈書之人，咨兩江湖廣督撫。

緝之

高宗諭曰。回民持誦經典。自唐宋以來流傳中國。相沿舊本。在回民家喻戶曉。並無毀謗悖逆之語。各奉其教。與僧道喇麻無異。焉能盡人其人而火其書乎。地方大吏。遇有奸民倡立邪教。自當實力究辦。若回教各省皆有。飲食作息。與平民等。不過不食狗豕肉耳。如以傳習經典。與邪教一例查辦。則安分守法之回民。轉致無所措其手足。卽上年蘇四十三之事。其舊教回民。倡義率眾。協同官兵。勦捕經朕節次獎賞。則朕之視回教民人。皆吾赤子。各省督撫。

安得歧而二之乎。於是陝西巡撫畢沅奏言：陝屬回民較他省爲多，而西安及所屬之長安、渭南、臨潼、高陵、咸陽及同州府屬之大荔、華州、漢中府屬之南鄭等州縣，回民聚堡而居，戶口更爲稠密。西安省城回民不下數千家，城中禮拜寺七座，其最大者係唐時建立，各寺俱有傳經掌教之人，稱爲阿洪，不相統屬。從前長安回民械鬪案件頗多，究因地方有司管教不善所致，非存心姑息。遇事寬縱，卽因其回民有意從嚴，遂至私圖報復，互相讎殺。此後如實有隨同新教，或別立邪教，卽當嚴絕根株，倘不過尋常念

經禮拜卽不必另立科條致滋擾累疏入

上大嘉賞諭各省行之自此內地回族安堵者垂八十年
至同治初元而後有陝回之變先是咸豐末河南巡撫嚴
澍森遣募荔渭涇陽回勇六百赴汴防守頗資其力未幾
澍森調任湖北挈回勇還陝遣撤之屬團練大臣張芾招
練以備寇元年二月粵賊陳德才合捻匪入武關三月陷
鎮安孝義窺省城全陝大震是時標兵多遠征省防空虛
巡撫瑛棨將軍托明阿飛章乞援

詔官文曾國藩於多隆阿舒保中揀一人援陝道遠弗能

至巡撫日與張芾勸紳民募團勇自守在籍知府梅錦堂率十八厥之眾守子午谷訓導趙權中以沙苑之眾守箭谷四月癸丑朔渭南回目馬世賢馬四元率回勇五百詣趙權中云奉團練大臣檄募同教人來助趙權中受之頃之民團陳茂經張龍驤張新緒俱陣亡趙權中懼令馬世賢等退守渭河渡口回勇聞警皆散歸什伍成羣道經華州之小張村伐民家竹爲矛主覺率眾噪逐斃其二餘回逃匿秦家村村固華州回民聚居者以族類被戕欲糾他村復讎小張村人患之結濱河村堡漢民萬人將先發制

之華州回大恐悉挈老弱渡渭而北寄居荔渭沙苑間揚
言三邑漢民傳帖相約期三日內盡滅我羣回半信疑伏
要衢伺之竟縛一人至搜其身果獲傳帖如所言蓋莠回
僞作以堅眾人之信也由是姦宄羣相煽惑人情恟懼一
日數驚而粵捻阻河不得渡連陷渭南華州東走華陰出
潼關趣陝州外寇甫去而回亂已勢若燎原矣回巢最巨
者在大荔曰王閣村曰羌白鎮曰橋店在渭南曰禹家莊
曰倉頭渡曰邸家莊歧於華荔渭界者曰乜家灘其他環
列村堡以數百計其回目狡戾者曰赫明堂曰任五曰馬

世賢曰洪興曰馬龍馬四元曰也代榮也代恩曰邨元魁
曰大瓜蛋曰哈哈娃其首難者赫明堂任五也初咸豐五
六年閒赫明堂任五在雲南倡亂事敗潛遁至倉渡於禮
拜寺私造器械旗幟羣回畏之惟其命是從王閣村羌白
鎮故與大荔之八女井鄰井民素强悍偵回之將叛也糾
萬人謀屠之富紳李樹德講解且與回和回陽諾之井民
遽散丁丑王閣村回糾眾猝攻井民井民無備聚族戕者
甚夥遂燒八女井防河壯丁聞變歸者逃死殆盡於是大
荔之沙南渭南之河北村鎮多被焚屠己卯燒孝義鎮殺

趙權中紳民死者五百餘人爲首者卽所部河南回勇也。而華陰漢民亦焚秦家村及沿河回堡耀州富平漢民起應之燒禮拜寺搜殺至同官之韓家原亂聞。

詔瑛棨諭解之五月張芾率四委員出省安撫漢紳蔣若訥回紳馬百齡與之偕瑛棨復檄署臬司劉鴻恩赴河北張榜解散適漢南川匪陷青石關粵賊另股陷山陽豫鄂援師久不至瑛棨計無所出則請調還各路陝兵。

朝廷以緩不濟急飭官文催雷正綰何紹彩等赴援令提督成明率京兵二千扼蒲州張芾由新豐渡渭戊子宿臨

潼之油坊街街故繁庶以回變商民他徙知縣繆樹本館
芾於空舍臨潼鄉團聞團練大臣至則率團勇萬人趨油
坊爲之衛芾悉麾之去己丑倉渡回目偕十餘人來謁自
訴無叛狀芾慰之曰汝等皆良回起釁者任五耳只誅渠
魁脅從罔治吾居此但待汝等一紙甘結耳芾不知任五
同來任五聞之大恚乃潛歸倉渡招其黨數千將手刃芾
以洩忿芾弗審也他回以語馬百齡諷芾速去壬辰天嚮
明四委員詣芾請行芾默坐不語馬百齡厲聲曰公等不
速行必欲同死耶四委員乃出鞭馬急走繆樹本復請行

芾曰姑食而後駕庖人以餅進芾索粥復解裝而炊食粥已方升車而任五大股已至擁張芾繆樹本蔣若訥馬百齡至倉渡芾罵賊不絕口回截其耳六月甲午芾與樹本若訥暨姪孫濤併及於難事聞

詔張芾照侍郎例優卹建祠省城以繆樹本蔣若訥張濤附祀馬百齡亦賜卹未幾逃歸大荔回圍同州同州民先屠城內回戶臬司劉鴻恩率守令登陴守九日而圍解時附省村堡多遭焚殺難民被創入省者萬計甲寅回犯省城西關遊擊孟柏林擊卻之乙卯犯東關總兵閻丕敏出

擊回繞西關燒金勝寺孟柏林復擊走之另股從西北來
提督馬德昭奮擊敗之斬四百人回初起不任戰故官軍
能以少勝眾然西同十數州縣嘯聚日眾馬礮器械日增
而省城鹽炭闕乏馬德昭以兵運之於河灘回時出要劫
弗獲丁卯回犯北關攻馬德昭營閻丕敏自東關孔廣順
自南路合擊走之次日回悉銳犯西北兩關德昭廣順分
擊卻之

朝廷以回匪攻城戕官萬無撫理

命吳振械由滇赴陝助瑛棨以多隆阿督陝西軍復

命勝保率師入關成明至蒲州屯嚴家莊不敢進有乞援者輒以軍食艱乏爲解同州官民大失望回以萬人攻長安之六村堡馬德昭率百騎赴援爲賊圍瑛檠遣兵救之出德昭憤甚越日復引兵血戰協領圖克庚阿訥勒和春歿於陣回陷六村堡屠數萬人七月雷正綰由商南至西安穆圖善軍次商州回圍涇陽用地雷轟城坍二丈知縣莫元賡堵合之是時鳳翔回殺漢民與西安同州相應甘肅悍回亦皆蠢動而漢南川匪未靖滇匪郭刀刀復由川入陝陷平利東路則粵捻由浙川入荆子關多隆阿已抵

商南還軍而東八月勝保連破回於臨潼朝邑遂督師前進灞橋諸回巢聞風逃遁西安解嚴官民大悅

詔勝保專督陝西軍雷正綰副之勝保已平附省諸回巢則規取咸陽之馬家堡蘇家溝以進援涇陽鳳翔而成明挫於同州移屯朝邑回復糾大股攻朝邑哀詞乞援

詔勝保雷正綰夾擊時粵賊掠商南捻匪掠雒南陝東大警閏八月多隆阿軍破粵賊於武關外捻亦東走盧氏甲午勝保親赴咸陽戊戌擊回於咸陽城北大破之克其壘四己亥回復糾大股復讎雷正綰親督馬隊擊走之追奔

三十里九月滇匪掠甯陝之火地嶺勝保遣王佐臣要擊於盤屋郿縣境連破之匪走寶雞山中咸陽回偵勝軍分隊南勦糾三四萬眾屯馬家堡四出攻掠雷正綰日有斬禽而賊燄未滅勝保檄王佐臣等還咸陽增調馬陞譚玉龍會攻庚申勝保雷正綰親擊破回於畢郢原漢之細柳營也甲子進攻馬家堡下之連克其壘六西路始通丙寅倉頭回踞白起營復破走之涇陽糧盡乞援勝保令成祿等趨三原出賊後烏勒興阿等徑援涇陽馬上馱米麥以濟城軍留雷正綰屯咸陽而自返省城與巡撫籌餉事時

陝中糜爛多隆阿援軍與粵捻戰楚豫閒弗能西勝保所
部才萬人不敷援勦乃奏徵苗練入關苗練者苗沛霖也
中外大譁回急攻朝邑

詔促勝保親赴同朝十月勝保自臨潼移駐同州以王閣
村羌白鎮爲回老巢環攻之回亦悉銳屢撲我營我軍入
戰皆捷軍威稍振十一月勝保令諸軍自同州西關連紮
至楊家河回先以馬賊數人求撫暗約咸陽蘇家溝塔下
沙河高陵悍回來援己未羣回麇至戰半日始卻次日回
犯城北復卻之當是時多隆阿已擊破粵捻諸寇聲威益

盛秦人望若時雨而勝保所部多降卒囂雜無紀律餉匱倚捐於民又以徵苗練故道路洶洶皆言沛霖反沛霖亦言引軍赴陝朝士交章論劾有

詔褫職逮問授多隆阿欽差大臣兼統其軍多隆阿已抵潼關知回巢精悍以王閣羌白爲最則馳赴同州駐軍城外回見多軍新至悉銳來犯多隆阿令曰回自起未嘗大懲創故敢先來嘗我今日之役繫全秦安危吾自臨陣觀戰有不勝者斬之比交綏士皆一當百須與克東西韓村回壘八悉燬平之十二月己卯令穆圖善統九營築壘洛

北陶茂林温德勒克西等騎步護之而自率姜玉順等覘地勢見洛南賊巢蟻列乘夜造浮橋二令陶茂林誘賊離巢回果全力出抗朱希廣暗渡河南擣破其營火光四起奪漢村三自此無日不戰進偃王閣村四里而營回首惟懼遣哈連升卑辭乞撫多隆阿不納哈連升者潼關副將前陷於回者也降捻宋景詩以勝保去位請隸雷正綰已而叛逃走山西直隸還山東時論皆咎勝保罪益加重焉是月涇陽陷雷正綰旋復之甘回掠隴州知州邵輔戰死陝甘總督熙麟駐潼關奏調馬德昭赴甘多隆阿檄德昭

援興安省城紳士哀詞乞留德昭駐防瑛棨以聞

詔允之

二年正月回犯西安省城馬德昭屢擊卻之甘回起平涼陷固原

詔熙麟駐慶陽督師調延綏兵並阿拉善王旗兵援固原川匪掠塾屋鄠縣省城糧路益梗瑛棨令王夢麟援鳳翔半途爲回截而返二月丁丑朔多隆阿克羌白鎮進攻王閣村下之初多軍患疫未能猛攻覘王閣羌白相距五里中列回營八繚以長濠而羌白堡塞壁立尤號堅巢多隆

阿謂宜攻其所恃先下旁營盡燬之乃嚮羌白與諸將約曰一鼓齊進再鼓畢登三鼓而不克者杖四鼓而不克者斬回以騎賊自西南馳來蘇倫保怒馬陷陣當者披靡諸將乘之樹梯爭登遂克羌白羣回老弱哭聲殷天悉屠之王閣回見羌白已破驚亂相蹂陶茂林伏兵自林中出須臾入其壘殲回以萬計獲輜械牲畜無算藏鏹數萬悉犒軍士日暮唱凱還營遠近兵民聚觀者無不加額稱慶歡聲如雷蓋羌白王閣爲回倡亂之地尤羣克之所萃云多隆阿患瘡不能騎部將王萬年傅開德均受鎗傷以省防

緊要令曹克忠率烏拉馬隊兼統瑛棨所部楚勇七營駐
長安鄠縣之交以通糧路三月癸亥多隆阿肩輿視師見
回之長濠自龐谷莊東至沙窩北至雷化西至喬午縣互
三十里輔以小溝木城爲負嵎計甲子至丙寅移營進逼
丁卯我軍薄濠邊回已布隊長濠外鏖戰良久我軍奪據
沙梁立四營以轟龐谷戊辰多隆阿親督諸軍攻北濠取
雷化次日下之庚午拔木城破東濠以十二營攻喬午自
督親兵六營攻龐谷下之遂克喬午孝義鎮天已嚮晚令
趙旣發陶茂林移營濠內比壘成已三鼓次日濠內立八

營於是同州回氛大挫而雷正縮亦屢捷於西路多軍所
至如摧枯朽矣四月丁丑朔多隆阿進攻倉渡築礮臺轟
回壘回亦修月城禦之次日四鼓令軍士蓐食約曰今日
不下倉渡毋以士馬歸也諸將人人自奮血戰竟日一躍
登陴火其壘追北二十里殘回阻渭水多溺死乃留七營
戍倉渡檄潼關道造浮橋濟師期與省垣聲勢相通是月
總督熙麟遣軍援平涼中途失利知府和英等敗死

詔責多隆阿兼顧甘防五月壬子陶茂林藍斯明等渡河
跨渭而營蘇倫保常興阿馬隊繼之趙旣發朱希廣營倉

渡高陵金順溫德勒克西馬隊護之次日復令金順騎軍
渡渭而南丁巳敗回於零口陶茂林移營駐之庚申金順
穆圖善追回至零口橋窄人眾遮殺過半多隆阿策回將
他遁豫囑陶茂林扼渭水伺之越日回果過戲河我軍躡
至回盡燬所過橋梁值大雨水發人馬皆病涉乃派卒輿
梁以濟軍士冒暑邁征疫瘡並作死者十二三多隆阿亦
患痢約穆圖善等出南岸朱希廣趙旣發屯交口堅壁勿
戰以待南岸捷六月丁亥回乘夜梟水渡渭撲我營趙旣
發開壁出擊躡之過河破回巢十三朱希廣亦率軍渡渭

而北回以萬眾包抄朱希廣趙旣發俱戰死多隆阿聞敗
憤將士不用命輿疾至交口辛卯親督諸軍三面進攻輔
以礮船殛回數百人回匿不出七月辛亥克蒲萄窪拜家
村乙卯克三府里燬白鴨嘴烏什回巢略盡丙辰拔沙河
老巢溺斃悍回數千漆水爲不流於是省東皆靖丙寅多
隆阿至西安與將軍巡撫計事瑛棨禡革遣戍擢劉蓉陝
西巡撫由四川率師入秦未至按察使張集馨暫權之
穆宗以鳳翔平涼被圍久諭多隆阿撥兵馳援乃令陶茂
林三千五百人援鳳翔曹克忠攻鄂穆圖善攻十三村八

月丙申多隆阿還駐交口庚子進屯普陀原大雨結橋以
渡令雷正綰攻永樂塔底馬升扼咸陽壬寅穆圖善攻十
三村下之進規高陵留兵戍之雷正綰克永樂塔底戊申
回由渭渡涇我軍移屯河北逼之回乘勢來犯多隆阿令
馬隊嘗之回敗走躡之長陀灣辛亥進攻蘇家溝回菁華
所聚地也甲寅下之殲回五千俘獲無算進破渭城灣殲
萬七千人羣回多走甘肅總督熙麟僻處慶陽護總督恩
麟在蘭州寇所至無人遮遏固原平涼井舍皆墟是時陶
茂林破川匪於郿進攻槐芽鎮白家凹皆下之遂薄鳳翔

壁七里河鳳郡解嚴知府張兆棟由是知名陶茂林擢甘肅提督多隆阿移西安將軍曹克忠授河州鎮總兵克忠渡渭擊白起營馬家埠破之關輔稍靖

詔促多隆阿援甘陶茂林移軍度隴與雷正綰會攻平涼十月庚辰川匪陷蓋屋辛卯曹克忠大捷於白吉原回走固原壬辰雷正綰由永壽趨邠州回解圍遁自是陝西回懼多軍威逐漸西趨而甯夏漢回互鬪兵備道侯登雲練民團備之將軍慶瑞惑撫議奏劾侯登雲勒漢團繳軍械丁酉回夜襲甯夏陷之侯登雲遇害漢民屠戮無遺滿城

隔數里慶瑞佯爲弗聞也次日靈州回起陷州城大掠滿營細載而去事聞

嚴旨責慶瑞促熙麟赴蘭州接印

諭山西巡撫英桂撥楚勇千人屯定邊直隸總督劉長佑揀勁旅二千提督訥欽統之援甯夏甯夏者宋之西夏地沃饒稻東接榆延西達涼州蘭州趙元昊據以抗衡中國者也自元年陝回煽變遣黨四出勾結於是靈州之同心城鹽茶廳之預望城伏莽滋起而馬化隆亦據金積堡設碣卡納亡命反側鴟張虎視一隅甯夏旣陷其酋赫姓使

使迎馬化隆入城羣回跪道左咸聽命焉是時馬彥龍馬
占鼇起和州陷狄道馬桂源馬本源起西甯逐總兵知府
桂源自爲西甯守本源自爲西甯鎮辦事大臣玉通不能
制其後馬文祿踞肅州自稱兵馬大元帥而岷洮渭源靜
遠循化會甯安定等處先後變亂甘肅全境無完土矣自
金陵合圍苗沛霖誅殛東南事機日順多隆阿乃請下兩
江督撫撥兵赴陝且催石清吉楚軍西行十一月大雪劉
蓉軍次褒沔以漢南賊勢猖獗約多隆阿分兵夾擊多軍
方圍盤屋未暇也十二月蓉至甯羌川督駱秉章增撥九

營助之

詔促劉蓉趨青石關與京卿李雲麟規復漢中城固會洪秀全召粵賊援金陵漢南諸酋始各離散陝西稍稍息肩矣

三年正月粵賊棄漢中興安東走多隆阿遣馬隊防西安劉蓉至漢中多隆阿益力攻蓋屋部將多傷亡二月癸酉地雷發城坍僅數尺諸將踐登士卒傷至三千餘卒弗克適陶茂林軍抵汧陽曹克忠擊破麟遊各匪雷正綰復大捷於靈臺援甘諸軍所嚮皆利多隆阿爲川匪所絀督戰

愈急甲午令軍士攻月城自登礮臺親鼓之鎗子傷左目
鼓音不絕次日克蓋屋捷聞

穆宗頒珍藥賜多隆阿遣其子雙全隨侍旋因傷病重請
以穆圖善權欽差大臣

詔允之三月劉蓉至西安甘回竄隴州之神峪河陶茂林
擊敗之雷正綰大捷於平涼之四十里鋪殛回目楊自明
等數千人四月多隆阿卒於軍德興阿真除西安將軍穆
圖善擢荊州將軍與劉蓉會辦陝事固原提督雷正綰仍
偕陶茂林曹克忠會師援甘訥欽罷以將軍都興阿接統

甯夏軍茂林已平神峪河約正綰攻平涼城城回乞援固
原糾悍黨八千來犯茂林要擊於米家溝大破之回走大
和溝爲正綰所截馬隊乘之追至紙坊川殲焉遂薄平涼
而營克忠連敗賊於長甯驛馬麻鎮李雲麟敗粵賊於仙
河以糧盡還興安羣賊集陝南陝回導至灃河五月戊申
金順與賊戰灃河陣斃七百人賊退踞秦渡彭基品渡河
擊之賊走鄠金順黃鼎追至盤屋之祖庵雷正綰陶茂林
圍平涼回糧藥俱罄閉門不敢出官軍樹雲梯以登戊午
克平涼回西保瓦亭庚申攻克之先是靖遠回張保隆款

於恩麟計取鹽茶固原兩城臬司楊柄銍總兵穆隆阿受
之固原在瓦亭北北路旣靖官軍乃趨張家川時粵賊分
踞樓觀黑水西駝峪連營四十里劉蓉調蕭慶高趨鄠穆
圖善率師助之乙丑劉蓉自率湘果營會穆圖善擊賊店
子頭敗績何萬春中礮死王謨米方多爾濟蘇彰阿俱受
創金順率馬隊突之湘將唐友勝橫出夾擊賊始奔丁卯
曹克忠敗賊郿之西河口戊辰賊棄郿走入蓋屋境六月
丁丑曹克忠敗賊黑水峪羣賊多降七月乙亥劉蓉穆圖
善敗賊於大峪西堡進攻樓觀時僞扶王陳得才由陝入

鄂穆圖善前派二十八營赴援無統帥劉蓉奏請穆圖善往湖北而以陝事自任

上令穆圖善移師赴甘秋雨兼旬雷正綰陶茂林屯瓦亭未能進而自隆德至張家川山澗層壘回於石壁上堅築兩壘瞰我軍八月己巳朔進攻木城辛未克張家川殲回六千餘俘二百三十一人殘回走龍山鎮雷陶兩軍躡之回棄龍山併入蓮花城壬申陝回孫義寶潛率四千人犯固原赫明堂內應固原陷壬午雷正綰陶茂林克邵堡馬堡乙酉進攻蓮花城失利正綰受矛傷兵弁死者千餘人

先是都興阿克寶豐駐靈州花馬池而河州紳民訴守將趙必達恇怯。

詔曹克忠赴河州本任蓮花城之敗雷正綰奏催曹克忠速來。

朝廷乃益促穆圖善曹克忠統兵赴甘而令都興阿克寶豐之軍與雷陶聲勢相聯授楊岳斌陝甘總督九月丙午粵賊陷階州雷正綰創愈策固原回且襲平涇分平涼戍兵屯涇之合道街令譚玉龍等還守涇已而固原回果犯平涼分黨圍合道劉正高譚玉龍擊卻之回走鎮原頃之曹

克忠至蓮花城官軍勢益振十月癸酉克蓮花城川督駱秉章遣總兵周達武等會蕭慶高劉厚基黃鼎援階州雷正綰念河州回氛尤熾奏以陶茂林馬步十七營駐蘭州旨報可且以蓮花城毗連秦階令曹克忠屯戍之雷正綰還軍平涼十一月周達武等軍至階州環城而壘城賊出犯頻破之乃扼北山諸隘阻舊城深溝以困賊蕭慶高黃鼎周達武屢與賊戰殺傷相當蕭舉臣姜福元陣歿賊酋亦受創賄遺番民二萬金假道由南坪出走番民以告周達武達武疑而卻之復訴之劉鶴齡劉蓉慮番民難信令

諸將各揀一營前往而留重兵於階。十二月戊寅，蕭慶高銜枚出隊，賊撲我南山營。周達、武江、忠淑兩面夾擊，蕭慶高復令諸軍攻附城各壘，戰良久，弗克而還。曹克忠攻高家堡，下之，復敗回於楊家山，回分兩股，一趨平涼，一趨華亭。適雷正綰由瓦亭攻開城，聞之，乃返旆窮追，一晝夜行三百里，及之平涼。花所鎮曹克忠部將亦追至華亭，回追追師，復合爲一。詐稱官軍闖入靈臺，殺知縣祝賓暘。雷正綰躡至回奪門，走涇州。官軍復擊之，乃越荔家堡而西。余萬明截之於黨原，斬俘殆盡。雷正綰還軍開城，張集馨已

卸陝撫

詔令赴蘭州助恩麟集馨率三營行次隆靜糧匱弗能進
雷正綰奏留行營是時回騎慄疾官軍苦乏馬難以制勝
而陳得才等在鄂豫歸誠東南事緩乃疏調副都統蘇倫
保常星阿溫德勒克西富森保四起馬隊自鄂赴隴皆多
隆阿舊部也

四年正月雷正綰遣沈懋貴攻彰義堡譚玉龍等攻固原
甲寅克彰義堡曹克忠攻蕭何城下其附近回堡五張保
隆復降於我率降回助攻固原固原回首孫義寶糧罄出

戰大敗入城城回約內應二月丁卯朔克固原孫義寶自
殺陝回還相戕騎賊奪北門走張保隆躡而擊之俘斬五
千餘眾入黑城子癸未曹克忠敗回於馬家嘴甲申復敗
之將臺堡進攻隆德堡下之蕭何城回目蘇上達詣張集
馨降集馨率所部由靜甯嚮省城克青家驛道威戎鎮至
洛門掃盪而前通渭甯遠隴西會甯皆無寇未幾鞏昌陷
正綰乃移陶茂林屯安會閒張集馨還駐固原於時諸軍
所嚮皆捷而餽餉不繼正綰奏以林壽圖督糧運
詔允之三月丁未雷正綰張集馨會攻黑城子降回張保

隆馬永和馬隊助之環攻三日回詭辭乞撫集馨攻益力
庚戌克黑城子次日曹克忠克鹽茶廳城皆甘回堅巢也
餘回併入李旺堡同心城捷聞

上大褒獎時口外獵戶焚掠肅州莠回乘之作亂西甯回
陷大通圍郡城甯夏回掠鹽場花馬池

上慮都興阿兵單飭雷正綰撥兵赴定邊顧後路促楊岳
斌兼程赴甘道員蔣凝學先赴西甯而切責辦事大臣玉
通養寇殃民蓋玉通諱飾已久

朝廷早察其姦矣自回逆煽變甘肅地荒人少畊種廢時

士卒忍飢血戰朝不保夕將帥徵餉不至則以空言撫慰軍弁怨咨而未有以發也會陶茂林丁憂乞終喪所部七營同時譁潰四月乙亥掠隴州長甯驛聲言赴陝劉蓉遣弁遮之寶雞適楊岳斌至西安增遣中軍赴寶雞招撫而潰卒已入整屋兩當境蓉乃檄標兵要擊之陶茂林奉旨改署任擊回安定失利部卒復潰所領十七營僅存其五恩麟調曹克忠趨安定克忠方攻同心城雷正綰攻預望城

詔烏魯木齊提督成祿援安定五月丁未周達武等克階

州移蕭慶高等軍還潼關禦擒匪楊岳斌全軍度隴雷正
綰疊克預望城下馬關進攻靈州奏訴餉匱曹克忠亦以
糧盡乞罷

朝廷以靈夏諸軍久不得要領切責都興阿穆圖善而令
駱秉章助兵協餉移陶茂林潰卒之餉濟克忠時甘肅臬
司楊能格駐慶陽督糧運乃飛檄催之雷軍夙倚糧涇州
曹軍倚糧鞏秦亦復資食於回至是轉運不至回糧亦罄
惟力攻賊巢乃可得食曹克忠已下同心城進駐甯安堡
聲言渡河援中衛已乃徑趨金積堡屯強家沙窩雷正綰

由靈州進兵與相聯閏五月己卯庚辰曹克忠連獲大捷
斬馘二千其地距金積堡十五里卡壘林立水鹹澀飲者
立病軍初至雜糠粃爲食已而草根掘盡不得一飽回偵
我軍疲率悍黨環攻之克忠驅飢軍與戰六月乙未克其
卡三丁酉戊戌克其卡五獲糧仍不能濟軍乃益約雷正
綰進攻庚子復克卡五遂薄金積堡回預伏馬賊萬餘自
十里外圍抄雷營先挫傷亡二千餘人曹克忠方下高章
三堡見敗徐令收隊回勢益猛營官周有貴秦久勝朱有
文董逢春等戰死弁勇死者數百人乃退二十里而營正

縮上疏自劾克忠白總督奏參楊岳斌初至頗陳克忠戰
功得

旨寬免七月靖遠教匪丁建善等作亂楊岳斌親討平之
八月己亥岳斌還蘭州省城初陶營潰卒爲陝兵擊敗降
者資送回籍餘黨自隴州走鳳縣劉玉興蕭德揚等連破
之歸誠者二千三百餘人分別留遣陶營亂靖而雷營變
復起正縮部將雷恆者與回首赫明堂通煽全營謀叛正
縮涕泣勸阻不能止憤極自刎不殊諸將救之乃率李啟
高步隊四營馬隊二起退固原回襲奪之再退平涼提督

譚玉龍周顯承先督糧涇州潰卒至輒招撫之留慶餉萬
八千金濟用遂得四營合舊部爲七營九月癸亥朔雷恆
赫明堂掠涇之二十里鋪劫餉銀麥麵官軍不能制時涇
州防軍僅五營譚玉龍新收潰卒及劉效忠胡大貴之勇
旂械多闕楊岳斌悉發涇臺存餉三萬金催陝撫接濟餉
械而金積堡回窺延鄜河狄回犯鞏昌圍甯遠馬營監義
岡川回竄張家川分掠隴州之馬鹿鎮另股竄慶陽之甯
州自蘭州至西安千里烽火相望居民倉皇奔走不知所
嚮楊岳斌乃令譚玉龍等移屯慶陽保精臺李助發移屯

隆德雷軍西潰者。聯捷林之望招撫成五營。十月甘涼道黎獻討肅州回。壬寅遣楊天興馬隊截之大通。我軍大挫。丁未米拉回陷臨水。擄糧臺黎獻軍飢潰。於是甘省勁旅叛逃殆盡。自楊岳斌楚軍外。僅曹克忠一軍與回相持而已。十一月岳斌部將李助發敗回於會甯之乾溝。劉祥勝敗回於李家莊。十二月壬辰朔回掠甘草店營官余華龍中鎗殞。金縣守將楊明海擊走之。癸卯曹克忠敗回於新市。傅先宗追至漳縣復敗之。自諸軍潰亂以來。回勢益驕。由隆靜達蘭州六七百里。山川複沓。楊岳斌僅恃自統楚

軍通驛路。乃奏調湘軍健將自助。疏曰：臣抵甘後，因兵餉兩絀，原欲就現有兵力以圖進取。自陶茂林軍潰於前，而兵不足。雷正綰勇變於後，而兵愈不足。是以不得已而有增兵之請。乃周達武因進剿番匪而不克來，蕭慶高因防守陝邊而不果來，而鮑超則調赴江西矣。李鶴章則奏留江南矣。蔣凝學則請假回籍矣。金國琛則因事留皖。一時未能赴任矣。鄰省既乏援師，而東南各軍之准調赴甘者，又復不能應手。現在河狄之賊擾於南，平固之賊擾於東，甯靈之賊擾於北，涼肅之賊擾於西。幾於剿不勝剿，防不

勝防臣若株守省城則飢軍終成坐困若出省勦辦則根本時虞動搖外察賊勢內度兵力實屬不敷分撥查記名提督朱蘭桂記名按察使劉連捷勇略兼備素所深知聞現在江西防堵該省兵力有餘請

飭該二員卽率所部赴甘以資援勦

詔如所請其後劉連捷等竟不至總兵鶴齡率川兵千人抵蘭州

五年正月戊辰楊岳斌發蘭州道鞏昌以赴涇留署藩司林之望中軍羅宏裕等守省城洮州回陷洮州廳城檄曹

克忠討之留羅進賢防鞏壬午岳斌至涇彭楚漢連敗回
於水阜河棗楚坡丙戌曹克忠軍次李岐山距洮州十里
回目馬芳等乞降克忠受之二月洮州同知淡殿臣率漢
回繳械馬克忠誅其首丁重選等壬子還鞏昌楊岳斌赴
慶陽與陝西藩司林壽圖籌防守三月壬戌蘭州標兵叛
初省城糧絀標兵王占鼇約十八人飲血插盟約回兵馬
文馬福等句狄河北山回來省將舉城以獻是日標兵集
東門外馬文毀城鎖放兵入中軍羅宏裕參將王金楷遊
擊李王安訶斥俱受創搜協署幕客委員悉戕之叛弁席

光斗馬耀祖呼標兵公圍總督署殺委員幕客數十人僕
從數十人親兵十餘人露刃向司道偪林之望飾詞入奏
癸亥北山回至廟灘狄河回至尖山遙爲標兵聲援標兵
益驕殺皋蘭縣鄧承偉括官民馬爲騎隊遠近剽掠省城
糧價每斗易銀三四寸兩割人肉療飢餓斃者不可勝數
司道百計安撫弗應也楊岳斌在慶陽聞變馳回涇州檄
曹克忠自鞏昌移駐蘭州是時回首孫義章等陷隆德圍
莊浪分股掠慶陽之西峰焦村冀入陝就食四月戊申劉
蓉至醴泉回已犯隴州劉玉興戰不利調蕭德揚邱時成

等自鳳翔前擊行次汧陽回已偏縣城庚戌蕭德揚等敗之寺溝邱時成等追至新興鋪劉蓉因汧隴事急移駐乾州增調蕭德見扼縣頭鎮移潼關防軍劉厚基黃鼎屯鳳翔將軍德興阿遣滿城馬隊二百助之林壽圖率知府方鼎錄自慶陽返西安籌甘肅東路糧運辛亥蕭德揚邱時成進規鳳翔敗回於黃里鋪洛城河次日屯鳳翔回退踞董家河孫家堡蕭德揚等乘夜擊破之追至靈臺之新集甲寅劉玉興復破之隴州境回多散走於是陝西汧隴皆靖惟北山定邊尙有回蹤楊岳斌乃由涇州道華亭以嚮

鞏昌譚玉明部卒復譚岳斌誅首亂者五人餘眾以陳德隆統之五月劉蓉還西安楊岳斌還蘭州案誅標兵爲逆者一百二十三人餘皆寬宥以安反側省城大定糧路稍通然每斗猶值二十金窮民鮮有子遺矣回首馬生義等復竄隴州崔三等還踞固關蔓延數十里銳意東走劉蓉遣邱時成黃鼎兼程迎擊會蕭德揚劉玉興等連日與回戰隴州殺傷相當戊辰回分嚮寶雞汧陽次日蕭德揚黃鼎復與戰晁家原回小卻分竄鳳翔汧陽我軍復躡敗之適安肅道蔣凝學至涇譚玉龍先以軍譚罷統領凝學勸

其立功贖罪。乃招撫花家莊數營。赴隴助剿。六月庚寅。玉龍至赤延鎮。其地當華亭上下兩關。辛卯。擊回於白楊林。大破之。遂克兩關。丙午。復敗之暖莊川。庚戌。雷正綰、蔣凝學攻回張家原。失利。辛亥。蕭德揚、洪殿元大捷於暖莊川。燬回巢幾盡。黃鼎進攻杜家嶺。追至磨坪川。連敗之。七月。甘回另股竄汧隴。蔓延於崇信、華亭。劉蓉調楊得勝、鄒太愚兩軍。及西蒙克西克馬隊三路夾擊。破神峪河回巢。四楊岳斌以東南寇急。親督彭楚漢、李助發諸軍趨清水。張家川。丙子。次通渭。傅先宗王得勝等已敗回於陽坪。移駐

邵家灣彭李兩軍移駐李家堡距張家川三十里八月己丑回乘夜攜眷遁走焦韓店次日竄張麻鎮癸巳回分兩股一併歸華亭一走隆德靜平閒楊岳斌令傅先宗赴通渭截之而飭諸軍環華亭而壘陝軍壁其東甘軍雷正綰張在山蔣凝學壁其北彭楚漢李助發壁其南王得勝壁其西陳德隆壁其西南丙午克華亭丁未追師至馬峽口失利總兵杜連升張得勝陣歿雷正綰援至回始退時蕭德揚黃鼎下尖首山劉厚基譚玉龍敗回於下關雷正綰克隆德汧隴華亭皆靖而狄河回襲陷鞏昌楊岳斌檄傅

先宗自通渭陳德隆自甯遠往援壬子夜傅先宗銜枚至鞏昌適風雨交作不聞馳驟聲傅先宗令諸將閭登天將曙喻正祥劈南門迎軍先宗大隊衝入遂克鞏昌俘斬三千餘人獲騾馬二千八百華亭回分竄慶陽固原九月乙亥楊岳斌自通渭還蘭州

詔移總兵鶴齡赴肅州提督成祿出關赴奇臺會李雲麟辦新疆軍務戊寅沈大興擊回洪河川失利譚玉龍至政平絕糧爲回乘全軍幾覆時小麥一石易銀一百六七十兩他糧稱是甘省窮瘠不能不仰給於陝劉蓉因事罷喬

松年爲陝西巡撫留蓉助軍務。捻偪潼華。陝東大震。十月丙午。洪河回陷平涼。雷正綰馳援復之。捻犯商州。自華陰走朝邑。曾國藩檄鮑超劉松山西援。鮑超屢奉

嚴旨催促。至魯山折還南陽。獨劉松山毅然請行。是爲老湘營西征之始。老湘營者。王鑫舊部名也。十一月。楊岳斌乞養。且陳病狀。

詔給假一月。移閩浙總督左宗棠爲陝甘總督。捻自華陰屯灞橋。西安戒嚴。十二月。圍省城。陝軍戰灞橋。三十餘營皆挫。

嚴旨責劉蓉寬假褫職回籍岳斌請留蓉赴涇

上不許辛亥左宗棠行次武昌

授爲欽差大臣按察使劉典改三品卿幫辦軍務張岳齡
爲甘肅按察使提督高連陞由粵東郭寶昌由皖赴陝穆
圖善援慶陽庫克吉泰德興阿先討陝捻再赴甘肅曹克
忠乞病開缺劉松山軍抵西安屯雨花寨甘回圍雷正綰
於秦昌鎮

六年正月甘回自宜君深入掠耀州蒲城富平三原東趨
渭南喬松年令劉厚基劉效忠禦之何珍璧邱時成自臨

潼援渭南庫克吉泰德興阿軍次朝邑回折而北走甲戌
雷正綰破回於泰昌回解圍走慶陽分黨掠鄜州庫克吉
泰都興阿移師援涇二月乙酉朔劉松山李祥和黃鼎擊
捻於灃河大破之西安解嚴劉厚基敗回於耀州劉效忠
敗回於乾州羣回還入甘境而西甯回陷貴德廳殺同知
承順玉通猶袒庇之靈州回犯鳳翔遊騎至岐山扶風於
是北山膚施安塞甘泉皆被回擾回捻僅隔鳳翔一河各
路請援喬松年茫無以應奏催左宗棠入關宗棠募勇未
集尙在漢口國子監祭酒車順軌布政使林壽圖均瀝請

左宗棠赴陝宗棠乃自漢口西發楊岳斌聞宗棠將至益乞歸里

詔允之三月以穆圖善署陝甘總督豐紳權甯夏將軍劉松山郭寶昌合擊回捻於醴泉乾州大破之四月甲申朔劉松山敗捻於晉成堡次日復敗之姜彥原捻走同州松山偕李祥和黃鼎等躡擊敗之捻連夜走西安松山寶昌還軍援省城戰於城南斃捻數千捻渡渭而北松山等躡之乃復渡渭南走盩鄠戊戌穆圖善至蘭州奏派蔣凝學總統諸軍

旨報可。總兵王仁和黃祖淦破回於肅州。提督鄧全忠破回於米拉溝。皆楊岳斌舊部也。五月，劉松山追擒至鄆。擒不戰而潰。還竄興平。六月丙申，左軍度函谷關。或白宗棠函谷神爲李左車。必祀而後度。宗棠笑曰：李左車豈足當吾哉。嚮晚，軍甫出谷，忽雷雹交作。山溜暴漲，車驟弁勇漂入大河，失輜重以數萬計。死者百餘人。庚子，左宗棠抵潼關，幫辦軍務劉典新授甘肅提督。高連陞並至藍田。時岳斌部將梅開泰會鄧全忠攻克米拉溝。米拉溝者地屬西甯西路河運要道也。承平時回族恃兇剽掠，招納亡命爲

盜賊逋逃藪寇興頻掠西甯涼州阻遏省城糧運及其克羣回畏威乞降於是河洮狄道西甯各回堡多反正而南八營李得昌各部十六萬人乞擇地安插

上慮回情叵測難信諭穆圖善嚴備之穆圖善乃令降回繳軍械張榜安民遣范銘赴洮張瑞珍赴蕭何城王得勝赴靜甯辦撫事自是穆圖善頗惑撫議左宗棠以捻回麇集陝境未能赴甘七月捻走三原劉效忠迎擊失利甘回出華亭入鳳翔掠隴州麟遊汧陽鄉團擊卻之甯州回入三水譚玉龍擊之回走淳化還宜君楊和貴追及回於郃

陽回遁黃龍山。劉厚基大破土匪於甘泉。進攻橋扶峪。下之。八月廿回掠鄜州。宜君壬午。劉厚基敗之。羌村己丑。回掠米脂。乙未。犯榆林。竄懷遠。乙巳。陷宜君。殺知縣張杰。河州回犯蘭州。穆圖善自將禦之。城外敗績。遂圍省城五日。楚軍將彭楚漢等奮擊走之。是時左宗棠駐臨潼。大雨連旬。兵頓不進。九月辛酉。宗棠親赴涇西。分布諸軍。劉典高連陞抵高陵。劉松山、李祥和、郭寶昌至三原。十月乙未。甘回陷正甯。雷正綰復之。庚子。陷寶雞。乙巳。楊和貴復之。劉松山、郭寶昌追捻至洛川。李祥和突遇回騎。戰死。以黃金

友統其軍辛丑捻陷延川丙午陷綏德丁未汧陽回犯鳳
翔總兵孫立士戰死是時甘肅土匪董福祥踞花馬池潰
卒遊勇互相勾結而陝回之遁入慶陽甯州正甯鎮原清
水者絡繹奔赴鳳邠汧隴之間寇氛殆遍而河州東鄉回
猶負嵎如故穆圖善乃調梅開泰自碾伯赴河州親督諸
軍擊回於洮河大敗之梅開泰遂傍洮河而壘十一月辛
亥黃鼎敗回於汧陽乙卯楊和泰敗回於鳳翔黃鼎適至
回悉向東北川口入山鼎追至靈臺不及而返己未劉典
擊回於宜君部將郭榮經戰死譚玉龍敗回於永樂鎮高

連陞敗回於孝義村。是時宗棠所部近百營。劉松山領萬餘人。郭寶昌三千人。劉厚基三千人。是爲剿捻之師。高連陞三千人。劉典五千人。是爲剿回之師。楊和貴。周金品。三千餘人。屯鳳翔。周紹濂二千餘人。屯宜君。吳士邁千餘人。防渭。復以親兵三千餘人。水師千人。黑龍江馬隊千餘人。分布華州。華陰。潼關。渭南。臨潼。閒是爲兼討。捻回之師。而劉厚基克延川。劉松山郭寶昌克綏德。劉典高連陞頻破回於宜君。諸軍所嚮克捷。於是羣捻銳意渡黃河。掠山西。以窺畿輔。壬申。自宜川之龍王辿乘冰橋北渡。連陷吉州。

鄉甯劉松山郭寶昌渡河躡之山西大擾其餘擒之未渡者游弋於澄城韓城宜川邠陽時與回合宗棠先遣喜昌安住全福率馬隊渡孟津趨澤潞以援晉令周紹濂赴宜川防黃河截餘擒之未渡者

穆宗以山右崑連畿輔

召左宗棠親往督師宗棠自率五千人東征奏以劉典代督陝甘軍與將軍庫克吉泰巡撫喬松年聯銜奏事

詔允之穆圖善親攻河州回不克還蘭州十二月戊子擒自垣曲入河南北趨衛輝丁酉左宗棠自陝東行咨劉典

自金鎖關移駐省城諸將均聽劉典節度是時傳先宗敗
回於禮縣彭忠國敗回於安定穆圖善乃令進規渭源辛
卯王得勝傳先宗克渭源留兵戍之進攻官堡而西甯守
將鄧全忠糧罄軍潰玉通猶犷撫議聽命於回成祿駐肅
州屢奉

嚴旨出關逗留不敢進黃祖淦勦賊陣亡穆圖善奏以楊
占鼇統肅州軍雷正綰迭克土回各堡收降二萬餘人慶
陽解圍

七年正月己未穆圖善遣范銘克官堡王得勝大捷於渭

源進規狄道辛酉金雞堡回竄甯條梁掠懷遠總兵文星
明與戰失利劉典自耀州出山移駐三原二月喬松年病
免劉典權陝西巡撫乙酉張岳齡至鳳翔次日擊回於亢
家河敗之辛卯黃鼎擊回於麟游小挫癸巳回陷鄜州分
黨掠洛川劉端冕率師往援與戰二十里鋪大敗之劉厚
基自英汪鎮來會丙申克鄜州高連陞自宜君進攻何家
莊殛回二千餘人擒其酋馬阿渾禹方魁等皆董志原回
黨也丁酉回犯秦州兵備道豫師擊走之穆圖善遣知府
舒之翰提督黃金山等會攻狄道州州距南北兩山中有

平川寨卡林立癸卯黃金山先破川內諸回傅先宗拔南山梅開泰彭忠國拔北山遂克狄道城於時淪陷五年矣其酋牟弗諦懼官軍威哀詞乞撫穆圖善飭舒之翰等相機圖之次日范銘攻店子川下之獲糧以濟軍時成祿攻肅州久未下所部與王仁和營勇私鬪焚掠河西村堡激變居民事下穆圖善並促楊占鼇赴肅州成祿剋期出關三月辛亥董志原回竄宜君之馬欄鎮分黨掠三水涇化三原甲寅高連陞下馬欄鎮追至劉店回出達臘坪抄我後路高連陞戰半日回始卻劉典遣李大有等出耀州援

三原回已走淳化之方里增遣夏奉朝吳國富等攻方里
下之三水守將喻兆圭陳集賢亦敗回棗池黃鼎敗回涇
河川是役旬日之間破悍回五六萬楚軍聲威益振辛未
穆圖善至狄道牟弗諦率男婦三千人歸誠官軍渡洮而
西進攻河州河州東南鄉回亦乞撫穆圖善受之甘回陷
鎮原慶陽官軍旋復之遂圍涇州四月甲申黃鼎冒雨往
援涇州解圍閏四月劉端冕敗回於韓村周紹濂擊回於
洛河南北大雨水漲殲二千餘人所棄牛馬驢騾以萬計
丁巳劉典移駐咸陽兼顧省防其時慶陽屬境悉爲回有

甯州合水相繼失守。駐甯防軍不能制。另股由寶雞渡河而南。李輝武追至斜坡。回見官軍。卽遁。勢常不及。李輝武伏麥地中。令二十餘人僞作鄉民刈麥。回果大至。伏起。敗之。乃折而東走。掠岐山扶風郿縣渭南。道員魏光燾先至郿。黃鼎吳士邁至扶風。岐山回不戰而遁。還入甘境。劉厚基擊回於延安。部將劉文華甘彰輝敗死。士卒傷亡過半。厚基亦受創。五月丁丑朔。劉典還駐三原。張岳齡敗回於汧陽。庚辰。李輝武至汧陽。會岳齡援馮坊。復敗之。譚玉龍戰歿於亭口。以黃鼎兼統其軍。仍屯邠州。甲申。涇河回犯。

長武闔定邦卻之龍德回掠華亭崇信入靈臺吳士邁連
擊敗之獲糧萬石牲畜萬餘頭丙戌涇河回復圍長武庚
寅黃鼎自邠州援長武擊回於水簾洞追至染店回二三
千人方刈麥黃鼎擊散之適雷正綰自政平來長武解嚴
高連陞攻正甯回先走入董志原魏光燾劉厚基進軍宜
川攻雲巖鎮下之俘斬五千餘人獲糧數千石牲畜千餘
頭誅其首張大有等八人於是北山寇巢皆盡六月西捻
平

詔左宗棠入覲所部劉松山郭寶昌喜昌等軍還陝

命金順進勦北山隴州回竄火燒寨羅洪德擊卻之吳士
邁敗回於麟遊高連陞周紹濂敗回於宜君辛酉周紹濂
擊回中部失利壬戌涇河回分掠邠州三水黃鼎軍與戰
世店其酋馬正和受傷遁癸亥回攻三水西關劉卓雲喻
兆圭等卻之甲子中部回竄白水魏光燾自宜川凱還要
擊敗之次日回搶渡渭河水師橫出截之回沿洛河東走
戊辰梟水渡洛值水漲溺死過半渡者四五千人未渡者
魏光燾高連陞追至殲焉壬申回攻郃陽聞魏軍至解圍
走坊鎮入馮原七月丙子朔魏光燾追至馮原回由黃龍

山竄洛川光燾阻洛東弗能過辛巳魏軍畢渡回已踰蒲城而西癸未及之曹村截回爲三一趨同官一趨涇陽一趨耀州劉典乃檄高連陞自同官躡之魏光燾遇於耀州策回必走楊家店高連陞設伏待之丙戌回果至楊店伏起乃大奔斃二三千人乙未李大有成定康敗回淳化庚子金順敗回榆林土匪扈彰詣劉厚基乞撫劉典令延安知府趙維慶等受之扈彰者環縣漢民踞保安安定間眾數萬人扈彰旣降土匪稽誅者僅董福祥一股耳八月金順劉馨集擊回於綏德大破之燬回堡十餘殲二千餘人

黃鼎敗回於長武回首白彥虎等自正甯竄三水趨職田
余明發李大有敗死乙丑白彥虎率萬人攻職田劉卓雲
禦之回乘夜襲營不克而遁左宗棠自連鎮入

覲

上詢師期宗棠奏五年西事可竣乃率師還陝自孟縣渡
河先遣卓勝軍入關九月雷正綰進軍靈臺回自瓦雲驛
來襲奮擊卻之壬午回襲綏德成定康卻之甲申雷正綰
黃鼎敗回上良十月丙辰左宗棠至西安省城

王定安曰回之居中國歷千載讀書仕宦耕種商賈視齊

民無異獨循其國俗諷經事天不祀鬼神又不奉正朔每月持齋禮拜此其難強同者耳自古外族內徙者眾矣周穆王遷戎太原漢光武遷烏桓渠帥於塞內又徙南庭數萬人居河西美稷至西晉劉石迭起據有中原然其貴族世胄至隋唐皆爲著姓名臣將相多出其中豈復泥守舊俗哉而回回自隋迄今遵其教弗稍變畛域明矣情亦稍異焉禮曰車同軌書同文行同倫假使回回遵

聖朝大同之化循三代周孔之典禮而以天方教儕諸浮屠老子偶一涉獵固亦

聖主之所不禁而儒者之所時有何礙於宇宙之大乎其
守之也愈篤斯其溺之也愈深天方教導人爲善而械鬪
戕殺累百餘萬弗加悔所謂詩禮發冢者耶嗚呼其可憫
也已

湘軍記卷十七

東湖黃學濂校字

湘軍記卷十八

東湖王定安撰

平回下篇

嗚呼。自秦隴變亂。西北生靈塗炭極矣。其初疆吏狃宴安。闖茸畏葸。寇至弗能禦。迨內患起。束手坐困。莫敢枝梧。

朝廷乃揀知兵大臣率師入關。如多隆阿楊岳斌之倫。戰略優矣。而一殞於整屋。一阨於蘭州。所謂遷地弗良者耶。其他雷正綰陶茂林曹克忠皆起偏裨。無籌餉之權。應變之方。驅飢軍當強寇。百死一生。深入敵境。糧盡軍譁。淹淹

不復振功雖未就其志亦足悲已迨左宗棠返旆西征期
五年滅寇乃竭鄰省之力供西餉士飽馬騰遂以盪平羣
醜數其時剛五年語云非常之功必待非常之人此其中
蓋有數焉同治七年十月左宗棠還西安檄高連陞屯廟
莊楊店周紹濂分屯雙柳樹魏光燾進王家角以達慶陽
劉端冕駐鄜州甘泉扼東西關鍵吳士邁赴鳳翔黃鼎駐
邠州張岳齡喻步蓮駐汧隴李輝武駐寶雞與鳳翔聲勢
相聯郭寶昌由同州赴宜川劉松山尙駐洛陽檄由茅津
北渡入山西乘冰橋赴陝左宗棠自率馬步四千屯西安

城西於是壁壘一新旌旗煥然改色矣土匪董福祥犯綏德窺榆林金順自榆林迎擊於五龍山大破之土匪遁邊外辛酉金順率師出邊壬戌追至禿尾河馬隊忍寒裸涉要擊於金雞灘敗之而邊外回窺神木府谷乃令成定康助攻葭州金順還榆林十一月劉松山全軍渡茅津抵平陽宗棠檄屯河西固晉防是時土回各匪叢集北山此勦彼竄諸軍久不得要領劉松山新至山西永甯卽購行糧渡河擊賊十二月己酉軍次綏德畱三千人扼軍渡防東岸松山詞匪巢縱橫二十里散布大小兩川間乃令易德

麟章合才攻大理川。自督蕭章開攻小理川。破其巢數十。騎賊不能越山者。追殲殆盡。小理川既下。餘匪西走周家嶮。松山躡擊克之。是時成定康自三皇峯破匪巢十餘。易德麟等悉下大理川。匪巢二十餘。凡官軍所下匪巢以百數。俘斬八千餘人。獲騾馬二千餘。爲老湘營西征第一大捷。癸丑。松山與成定康分兩路夜行。黎明匪見劉軍幟。駭而走。及之南岔。路狹溝深。跌死無算。至晚稍息。仍夜起躡賊。望小里溝火光絡繹如星。延袤數十里。松山誠軍士魚貫沿溝行。蕭章開先導。次晨官軍偪至。匪以悍黨殿後。殊

死戰章開驅之良久悍黨皆靡前途匪越山西逸者尙七
八千人丙辰松山急行五十里及之定康截其去路匪驚
亂俘斬過半松山度榆林至靖邊匪巢林立若鼓行而西
匪必以全力回顧河防之嚴自解而行糧不繼乃屯安定
殺騾馬充飢丁巳至胡家山與匪酋李雙梁隔一山乃令
易德麟先行松山率各營繼進則匪已與德麟接仗聞松
山至卽駭走追至小李莊擒斬千人戊午北攻隆腰鎮匪
西北走黑牛川邱家坪松山躡擊破之敗匪併竄鎮靖堡
鎮靖堡者董福祥老巢也其眷屬則竊踞靖邊辛酉松山

率全軍抵鎮靖。董福祥之父董世有跪地乞降。松山令造名冊繳械馬。其扈彰餘黨未就撫者亦詣鎮靖造冊歸誠。松山因暫駐軍焉。是時陝回虜集慶陽北通金積東走陝疆往來無阻。穆圖善玉通皆狃撫議羣回旋服叛。肅州回款於楊占鼇已報收復。成祿仍逗畱不出關。於是隴西士民望左軍如時雨。

朝廷益倚宗棠爲長城矣。

八年正月陝西布政使林壽圖乞養。

詔以翰林院侍讀學士袁保恆專辦糧臺。己卯郭寶昌至。

韓城敗回於白馬灘庚戌復擊之石堡回走延長延長回飽掠方歸劉端冕要擊之獲糧二千石騾馬五百匹乙酉魏光燾將赴甘泉遇回於將臺截擊敗之次日回首胡麻子踵至光燾設伏敗之棄糧械盈塗胡麻子者虎麻子之譌賊中呼虎元帥十八凶渠之一也二月左宗棠移駐乾州益督諸軍西進是時董志原回益飢蹙馬化隆自金積堡以橐駝千餘餽盜糧猶不支則糾十八營之眾傾巢東犯戊申踞正甯村堡以窺秦川黃鼎遣將伏牛堡斬其首虎麻子庚戌晨大風回出萬眾挑戰騎賊森騁鋒銳甚鼎

堅壁弗爲動。嚮午，鼎度回隊已齊，乃麾精騎壓之。甫交綏，回佯敗，棄騾馬餌我。鼎令曰：「妄取者斬。」躡之白吉原，援寇已大至，圍我軍數市。鼎念軍已深入，乃結方陣團擊。良久，馬隊小卻。鼎督步隊短兵血戰，倂匪至高里坊，阻深溝，反撲愈猛。副將劉治刺其酋，余彥祿落馬，回始驚潰。余彥祿亦十八營悍魁也。於是回首陳林，馮均幅聞敗，皆還走。董志、雷正、縮張、岳齡，要之半塗，皆有斬獲。左宗棠益檄諸路馬步剋期大舉，誓破董志原。漸次入隴，回聞恟懼，議棄董志，徙金積堡，併力拒我。乃合十八營爲四營，以其半護家。

口輜重先行。崔偉馬正和率悍黨萬人殿後。而以遊騎出泰昌正和擾涇河。綴我軍。宗棠檄黃鼎自邠州與雷正綰李耀南馬德順會師靈臺。備乾餼十日。期必破賊。甲子。回老弱輜重去。董志北走。雷正綰黃鼎自長武渡涇。馬德順李耀南自靈臺繼至。會於泰昌。其時悍回伏董志。以千騎憑溝拒守。鼎偵西路空虛。分雷軍部將陳義馬軍部將楊世俊取蕭金鎮。西達鎮原。鼎與正綰德順耀南四路並進。乙丑。次邱家寨。回遊騎數百。望見輒遁。官軍已徧卡。阻溝不得前。鼎飭步軍踰溝上平原。繞卡後。回驚潰。比伏出而

敗賊撓之相率狂奔遂下董志原及焦村石社蕭金鎮回堡悉破平之黃鼎雷正綰李耀南馬德順俱移駐董志陳義楊世俊復鎮原回老弱輜重行甚緩相距僅一日程而殿後悍回一走環縣一趨三汭河期於黑城子會齊以達金積堡於是雷正綰李耀南出蒲河川會陳義等於鎮原進攻三汭河黃鼎馬德順出驛馬關以嚮環縣道遇崔偉馬正和擊敗之丁卯收復慶陽戊辰躡之蔡家廟回越環縣北走次日黃鼎還軍董志雷正綰追回至三汭河要擊其輜重老弱拋棄過半還軍蕭金鎮回由固原分竄蕭何

預望半角等城涇州慶陽所屬肅清是役殲回二萬餘獲
騾馬萬計拔難民萬餘人甘回聞風股栗左宗棠將移駐
邠州令諸軍興屯田徐圖進取而高連陞營哥匪謀變連
陞捕之急叛卒戕連陞及部將黃毓馥賀茂林等十人遂
圍同官守將桂錫楨及金鎖關守將楊銘濬馳援皆受創
周紹濂聞變要擊於古泉大敗之殛三百餘人收降五百
餘人劉典遣丁賢發扼耀州收降四百餘人其百餘人竄
長武雷正綰悉數禽獲解大營駢誅宗棠以連陞所部令
魏光燾李輝武丁賢發分統之凡五日而事定是時劉松

山率四營駐鎮靖安插董福祥降眾十餘萬人其分駐綏德十營叛踞州城松山聞變馳還清澗遣部將曹義勝赴綏德訶之初各營不知統將所在頗惶惑及聞松山至清澗皆大喜乃乘哥匪臥刺百餘人其被脅弁勇皆反正縛其首逆謝永青等五人解清澗松山駢誅之並案問叛卒百二十七人哨官四人皆寘於法凡旬日而事定自松山渡永甯而西設采買局於軍渡分軍屯綏德周家嶮瓦窯堡轉糧餉以達鎮靖延袤千里弁勇散處僅章合才往還監護故哥匪得乘閒煽誘非松山恩信素孚其不爲雷陶

之續者幾希矣三月

詔促左宗棠赴涇州受總督印兼顧秦隴以陝事責劉典邊外事責金順

命張曜自古城移軍西進爲金順後路四月戊申邊外回犯花馬池金軍將富勒琿擊卻之回自烏拉搶渡竄札薩旗甲子金順自將出邊回已遁乃率諸軍道札薩郡王苔拉旗由包頭迤西渡河而進是時董福祥李雙梁等皆安插荒地耕懇爲農延綏所屬遊勇潰卒爲郭寶昌等所殲其叛軍變名溷迹者劉松山等搜斬殆盡北山漸謐魏光

燾攻老巖寨克之十五寨回巢皆平郭寶昌連破遊匪於
延長鄜州境周瑞松破匪於野豬窪張維美彭芝蘭破匪
於紙坊盤龍寨匪首杜占元等八人皆伏誅陝西肅清左
宗棠進兵甘肅五月檄劉松山北趨定邊花馬池魏光燾
周紹濂劉端冕出合水甯州正甯嚮環慶雷正綰黃鼎由
董志原涇州趨鎮原崇信華亭固原李耀南吳士邁由隴
州寶雞趨秦州臬司張岳齡乞病以李耀南兼統其軍宗
棠率親兵道永壽邠州長武以赴涇令馬德順等暫駐靈
臺之上良百里鎮策應南北遂開賑恤集流亡勸民種秋

糧兵燹遺黎栩栩有生意矣。河州回竄成陷兩當。李輝武遣軍擊敗之。回走徽。另股竄清水之唐藏。癸巳輝武復擊敗之。丁酉華亭回竄秦州之隴城。李耀南湯聘珍中途截之。回走香泉。己亥吳士邁破回於隴城。梅開泰破回於伏羌之馬家峴。蘭州運道始通。先是董志原餘孽竄甯夏甯回導之。北擾蒙古旗地。由鄂爾多斯入烏拉特。河東七旗蹂躪殆遍。遂道磴口趨阿拉善牙帳。阿拉善親王遣其台吉長史佐領等率蒙兵擊之。回燒磴口廬帳。掠沙金托海。毀臺站。殺官弁。進圍定遠營。燬其親王園第冢墓。適張曜

軍次蘭扇。要擊於察漢綽爾。大破之。紅柳樹伏寇。頓起。張
曜烏爾圖。邠遜奮擊敗之。追至廣宗寺。定遠之圍始解。六
月。左宗棠駐涇州之瓦雲驛。金順自昭君墳渡河。以酷暑
暫屯什巴爾臺。就水草。張曜軍次纏金。偵甯夏西岸。自石
嘴山至中衛。陝回麇集。遣將要擊之。回見官軍。輒引去。金
順檄富勒琿移花定防軍隨征。七月。黃鼎擊土匪張貴於
威戎堡。連破之。威戎堡隸靜甯。張貴者賊中呼剛八。鹽茶
廳人。乘回亂。踞威戎。脅民堡七十餘。以其黨侯應曾踞通
渭之黃家窰。相犄角。威戎既下。平涼秦川伏莽漸靖矣。時

吳士邁李耀南湯聘珍等軍抵通渭南路匪巢肅清宗棠
乃檄黃鼎簡敬臨由固原北進八月劉松山軍抵靈州甘
回疑懼詣營自訴松山諭曰官軍此來討陝回之拒命者
已撫甘回皆良民勿懼也乃飛札金積回酋馬朝清告各
寨安居無恐且以甘回十餘人前導示官軍無他意松山
聞陝回余彥祿馬正和馬長順等踞郭家橋壬寅引軍擊
之回吹角出巢殊死鬪松山自督諸將陷陣回始大奔遂
下郭家橋回堡二十一悉毀平之躡至下橋溺斃無算餘
回竄吳宗堡方郭家橋之戰甘回大恐皆傍堡列隊放鎗

大呼松山誠軍士置弗問而甘回來者益眾我軍搖旗布陣則回皆反走乙巳甘回徑犯官軍營松山始令軍士開壁擊之回雖敗弗追也馬朝清者故反側難信屢代陝回乞撫而暗喉金積悍黨合敗回踞吳宗堡決秦渠水以阻官軍丙午松山次下橋吳宗堡角聲齊作回已大出松山軍益暇劉錦棠等分三路進回以騎隊包抄弗爲動挺矛下馬我軍短兵相接戰愈猛回右路先潰收入堡丁未分軍修秦渠回出馬步列十餘里松山調修渠諸軍合擊之追過吳忠已酉遂徧吳忠而壘庚戌吳忠回依堡而陳金

積回復來助。松山覘回騎少，心異之。登高瞭望，則騎賊已至下橋西。匿樹林廢墟中，冀襲我營。松山令諸軍專攻堡南，自搜樹林廢墟伏賊。鼓聲起，諸軍大呼而前，回屢挫不復戀戰，分收入堡。匿不出。松山乘暇築寨，頓輜重。甲寅，松山夜襲陝回馬正和等，破其巢十餘，追至吳忠堡南，回騎阻濠不得過。於是甘回皆吹角出寨，撓我軍。松山逆擊之，皆敗歸，仍匿不出以待援。而白彥虎馬生彥等果由黑城入金積。松山分路逆戰，俘斬千餘。是時秋禾熟，回時出刈稻。松山屢要擊之。馬化隆益召崔三李經舉等至金積。又

調靈州回並河東西悍回來助。丁卯松山奮擊大破之。於是遠近紛傳吳忠已下。固原回紛紛北徙。白彥虎竄入固原。雷正綰黃鼎合擊復之。而言者乃以劉松山濫殺激變上聞。

朝論頗疑松山難恃。

命左宗棠促郭寶昌移軍榆林。顧北防。穆圖善亦疏言馬化隆宜撫不宜剿。恐激其走險。不可收拾。疏入。值左宗棠捷報至。

上疑稍解。時金順張曜會師沙金托海。方由中灘鼓行而

西而甯夏降回復叛圍郡城乃兼程赴援戊辰抵甯夏回
已退屯三十里九月己巳朔金順張曜擊叛回於甯夏城
外大破之

上以山西邊防警詔郭寶昌赴晉助河防晉撫李宗義故
庸謹不知兵倚任臬司李慶翱左宗棠奏慶翱不可恃

詔促郭寶昌赴山西辛未雷正綰等攻黑城子下之還軍
固原白彥虎竄踞固原之三營戊辰周蘭亭簡敬臨攻三
營下之誅其僞元帥楊文治庚辰攻李旺寨下之進克穆
家潭擒其酋楊輝雲自楊文治伏誅羣回益震懼馬化隆

累爲劉松山所敗。乃囑甘回哀詞乞撫。陝回不自安。於是
禹得彥白、彥虎、李經舉等棄預望城。由鹽茶廳西竄。崔三
馬生彥、馬正和等由甯安四百戶悉數西趨。規由打拉城
出會甯安定。南合河州之回。苟延喘息。宗棠乃檄黃鼎、馬
德順自黑城子躡之。壬午。兩軍冒雪行。甲申。次鹽茶廳。見
炊煙尙然。知回去未遠。馬德順領馬隊急追四十里。及之
西安堡。一望平川。回帳布滿。猛見官軍至。婦孺皆號哭。驚
走。馬德順殺五六百人。黃鼎暨呼敦馬隊追至。復殺千人。
回散。渙不復成列。馬德順輕騎覘地勢。爲伏賊所刺。與哨

官張顯揚歿於陣乙酉黃鼎等克打拉城有

詔褒獎雷正綰黃鼎

賜上方珍玩馬德順等優卹是時河北陝回竄入賀蘭山張曜敗之福因寺阿拉善王以聞

詔金順張曜乘勝兜剿

飭左宗棠遣軍兼顧蒙部已而金順張曜至河北引軍而南甘回納萬元糾陝回迎戰漢渠金順張曜從東繞擊大破之回走納中閘我軍追至龍王廟南悉拔其東南各壘金順張曜分屯漢渠東南毀回寨四殲守賊殆盡己丑黃

鼎攻新堡子。下之。陳林馬正和還竄長流水。雷正綰自同心城。周蘭亭自四百戶。冒雪擊之。陳林等先以眷屬歸金積堡。乞款於曾傳理。馬化隆復代白劉松山。於是雷正綰周蘭亭進黃渠橋。簡敬臨張福齊進韋家堡。與松山會師。初松山已下顧家寨。羣回益恐。馬化隆以陝回禹得彥等稟結呈松山。轉白宗棠乞緩師。松山令先繳馬械。再議撫。馬化隆乃以朽鎗羸馬應之。而晝夜修壘浚濠。如不及。松山知其詐。故令營夫刈草覘其動靜。回果大出抄我。傍敬家莊兩堡。而陳松山麾馬步夾擊。燒其兩堡。於是吳忠回

乘夜決秦渠逼水東流翼灌我營松山令諸將分攻壩西
回寨下之乃開溝壩令大溜西趨回多溺死劉錦棠復下
溝東回寨閱數日松山令軍士攜鉏鍤草束至水漫溝掀
土填濠回收入寨松山麾步軍踰溝躡之破其寨三進攻
王莊梁莊皆下之自秦渠水溢松山糧運自河西來者紆
道而行而王家樓張家灘當其衝松山令劉錦棠等悉攻
下之毀其寨七壘二於是馬化隆益震恐嗾金積漢民詣
營求撫松山詰之知漢民被脅具保詢其誠僞則僉云不
知也松山益調花定四營來助雙壽吉林馬隊亦至庚寅

馬化隆遣漢民詣營獻米糧十萬斛。松山諭曰：先繳馬械，乃可言撫。甘言微利無益也。乃進攻金積。旁近七寨皆下。之壬辰，進攻靈州。令馬化隆諭令獻城。乙未，馬化隆陽乞展期，暗移靈州眷屬於金積，引陝回入城助守。丁酉，松山令軍士裹糧夜起，分五路向靈州。見城南野潦縱橫淺者，猶及馬腹。劉錦棠、蕭章開分左右，鳧水而進。松山直擣中堅，克其外卡，回騎出東城抄我軍。余虎恩、雙壽率馬隊逆戰。董福祥步隊副之良久，回走東南。劉錦棠、蕭章開已薄

城新卡而入，回開東北門出竄，遂克靈州，并其城南石壘。

下之俘斬二千餘人。搜回酒馬元生馬致和郭有利等。駢
誅之。獲騾馬千餘匹。拔漢民七百餘人。是夜松山留軍守
靈城。自將趨買家莊。劉錦棠蕭章開趨海子墩。軍至皆下。
旁寨見火光如晝。輒開門逸。次日還靈州。以黃萬友李樹
棠兩營駐之。十月己亥朔。松山自率馬步還下橋。督劉錦
棠等分攻里仁渠等巢。下其寨八莊。二楊世俊連破陝回
於狄道境。回還走河州。黃鼎赴靜甯。收撫張貴降眾。以楊
世俊徐占彪分屯安定。會甯靜甯。省城驛路無阻。雷正綰
周蘭亭攻張恩堡。僞先鋒袁希孟降。簡敬臨張福齊亦自

澤軍言 卷一
韋州來分駐秦渠內外距金積遠者十餘里近者七八里
左宗棠慮號令歧檄諸軍均聽劉松山進止松山自遭疑
謗治軍如故至是金順奏陳松山捷狀

詔獎以謀勇兼優前絳吏議悉除之松山益自奮厲思得
當報

國時馬化隆首鼠兩端撫議久不決乙巳松山乃出秦渠
南進板橋蔡家橋冀翦金積羽翼有頃回巢角聲四起憑
渠發礮劉錦棠等越橋卡鳧水抄擊回敗走余虎恩雙壽
馬隊突之驟若風雨回不得歸守巢者望風股栗皆開壁

西遁。下其村寨三十餘。是夜馬化隆復乞撫。次日代繳陝
回戰馬七十七匹。鎗矛一百五十件。松山少之。限三日畢
繳。復獻朽械羸馬各數百。松山固知其非誠也。時陝回馬
正和余彥祿方獻款。而陳林馬長順仍桀驁抗命。馬化隆
懼官軍進討。續納騾馬八百八十二。鎗械一千七十。松山
度回多心雜。久且生他變。以吳忠回皆他徒。堡寨空。乃令
就撫者安插其中。而陳林糾黨阻截。馬正和附之。諸降酋
不能禁。撫局益不足恃矣。癸亥。左宗棠受總督印於涇州。
奏以周開錫總統南路軍。穆圖善仍駐蘭州防守。是月。崔

三旬狄河回出掠穆圖善遣傅先宗擊敗之金順張曜擊回於甯夏連敗之以回首楊士恭結陝回援應納王各寨也十一月戊辰朔左宗棠移駐平涼庚午劉松山以回情叵測約雷正綰張福齊簡敬臨周蘭亭會剿適金運昌由靈州來羣回覘官軍大集自金積旁堡紛紛出拒官軍布陣益寬步賊望之皆瑟縮松山麾馬步夾擊回大潰不止下村寨二十餘乙亥松山令軍士築新壘逼賊且戰且築金積回大恐夜徙東西各寨避之傍波浪湖築長牆約三里冀自固丙子松山約諸軍攻長牆破之簡敬臨銳欲與

松山合隊繞波浪湖穿回壘而過大挫陣亡己卯回復築
長牆自金積外濠迤東約三里又迤南至波浪湖里許庚
辰松山督軍突之回殊血戰提督李就山殞於陣弁兵傷
者二百四十六人陣亡三十八人辛巳回復傍湖增修長
牆壬午松山會金運昌攻其西北劉錦棠等攻東北毀其
長牆甲戌劉錦棠蕭章開攻各莊礮臺悉破平之初雷正
綰周蘭亭張福齊徐文秀等移攻金積左宗棠以平固涇
慶千里空虛檄周紹濂分屯黑城李旺同心各堡桂錫楨
馬隊屯四百戶丁賢發自鎮原出固原魏光燾劉端冕由

慶陽合水前進相犄角。回酋馬光明自固原東北竄同心城。桂錫楨卻之。乃夜襲紅德城。魏光燾自環縣馳援。回解圍遁。噉元城回海生春等出白家鄴。掠姜家坵。魏光燾丁賢發會攻元城。下之。丁賢發復敗之。白家鄴於是海生春畏懼乞降。魏光燾受之。以其眾八百餘口安置白家鄴。楊世俊擊回於固城。清水紅土窯屢敗之。回酋馬正和糧匱。噉崔三白彥虎等自狄道襲同心。掠糧東竄。將拊雷正綰諸軍之背。以解金積圍。徐占彪楊世俊邀擊於嶢口。敗之。回分由魯家溪好麥川走西南。黃鼎至靜甯。出會甯截之。

十二月戊戌朔。傅先宗敗回於甯遠境。黃鼎至郭城驛。回已越打拉城而東。將偪同心。周紹濂所部分護糧運未歸。迎戰失利。魏光燾丁賢發聞警。自固原馳援。回走鹽茶。掠食莎羅堡。鴉兒灣。黃鼎屢擊敗之。乃分由中灘出打拉城。竄靖遠而西。徐占彪楊世俊追至甘草店。回還入狄道。金順張曜攻河北王家疃。陝回來援。合擊破之。殛回數千人。斬其酋趙五阿渾。進攻馬泰納洪兩寨。下之。

上以甯夏距金積近。飭劉松山與金張兩營聯絡。是時劉松山等軍圍攻金積。戰無虛日。破其旁近寨大半。己酉夜。

松山率劉錦棠等撲東西兩門。依牆列陣。火箭延燒回帳。壯士攀牆而上。薄其內濠。濠內回自斷卡橋。以遏我。竟弗克。松山益備雲梯束草爲攻具。而馬趙兩寨賊刃林立。松山襲破之。回方自韋州掠糧歸。踏冰以渡。松山縱兵截殺。牲畜糧械填委於道。於是馬化隆大困。頗怨崔三等。久不赴援。而崔三禹得彥馬生彥白彥虎諸酋。屢爲官軍所敗。狼狽歸巢。馬化隆猶弗知也。乃令其黨謝四促崔三急赴金積。喉另股擾北山。冀斷劉松山金運昌糧道。己未夜。襲陷定邊。宗棠請以郭寶昌三營自綏德馳赴定邊。顧松山

等餉道。

上以晉省河防急，郭寶昌仍畱山西，飭左宗棠分兵馳援河州，回竄西安堡。聲言道預望，韋州援金積，宗棠檄黃鼎討之。

九年正月庚午，黃鼎自瓦亭進固原，回騎竄黑城同心，繞山路而出。丁賢發敗之石峽口，馬化隆遣其黨馬正剛等出惠安堡，分由甯州正甯入陝西之三水，另股竄甘泉，與延綏土匪合，定邊回復陷安定，進掠甯條梁。於是米脂同官蒲城韓城邵陽中部宜君長武大荔皆警。

朝旨嚴催左宗棠撥勁旅還顧陝疆馬化隆自詡爲得計。益引援賊冀解重圍。丙子。陝回自胡家堡竄秦渠。南踞石家莊。就廢堡修三壘。松山覘石家莊距吳忠近。令譚拔萃等攻之。須臾三壘皆下。以易致中朱德開駐之。庚辰。進攻馬五寨。寨大而堅。悍黨踞寨東卡。誓以死拒。松山飭譚拔萃克其外卡。自督軍士舉薪燒寨門。飛礮中左乳。松山落馬。軍士負入破屋中。諸將聞統領受創。皆奔視環泣。松山叱其出戰。諸將憤怒陷陣。焚溺墮死者無算。俘回酋馬五。遂克其寨。還報松山。松山曰。吾傷重不得復生。汝等殺賊。

報

國吾死不憾遂薨時圍攻堡東兩寨之師未撤也宗棠急檄其從子布政使銜道員劉錦棠統其軍松山湘鄉人舊隸王鑫部其行軍篤守鑫成法故號老湘營曾國藩之討捻也湘軍皆不樂北征獨松山與張詩日李祥和朱式雲從其後捻竄陝西

朝旨促鮑超入關超託病乞罷松山毅然西行其時部卒才五千所嚮皆捷後增至萬餘人遂屹然爲強軍捻善以精騎挺矛入陣他軍遇之輒亂行松山結方陣橫行寬數

里騎賊雖抄入陣弗爲動。捻尤畏之。左宗棠督師秦隴。所部百數十營。松山功尤最。自入靈州。蕩平堡寨五十。回巢九十餘。皆策馬前行。躬冒鋒鏑。回酋之曾犯顏行者。無不聞名膽落。功垂成而身殞。中外惜之。松山起卒伍。積功至廣東陸路提督。年已三十有七。聚婦未聘者二十餘年。至平捻。西旋。婦家送女至南陽。逾兩年矣。宗棠勸其完婚。甫半月。率師入秦。以訖於卒。無子。以從子劉薰爲之嗣。事聞。詔優卹。予諡。陝甘等省皆建祠。劉錦棠加三品卿銜。提督黃萬友副軍事。是時馬化隆兇燄復熾。喉黨四出。截我糧。

運冀牽動圍師。乃上規峽口。下瞰下橋。永甯洞將全據。秦漢兩渠以自固。先是松山約雷正綰築壘峽口。扼渠上游。正綰僅築三壘。而回已至。三壘皆陷。雷軍糧運遂梗。丙戌。周蘭亭張福齊以糧盡。退屯鳴沙洲。回日用大礮擊正綰營。正綰忍飢堅守。傷亡相繼。庚寅。黃鼎率周蘭亭韋占彪等馳救。戰於峽口。韋占彪中礮殞。金積回蠶集。扼牛頭山。阻鼎歸路。雷正綰乘閒突圍出。峽口遂失。劉錦棠策回踞峽口。勢且洩。渠灌我壘。乃與黃萬友急進。回騎先敗。步賊走東南。因議夾河築壘護糧。運兩日壘成。回來爭錦棠偕

金運昌卻之。陝回自甯條梁入北山，出甘泉，東犯韓郃，走高陵，涇陽醴泉，乾州扶風，永壽，出靈臺，折竄董志原。劉典遣張佑庭等分擊。左宗棠復檄李輝武等助之，回還走甘境。馬化隆復結河狄回竄渭源，窺鞏昌。湯聘珍遣軍擊走之。傅先宗敗回於禮縣，回越鹽關，掠成徽兩當，周開錫遣軍自伏羌截之，回走秦川。二月戊戌，金積回攻板橋，董福祥營蕭章開與福祥夾擊，卻之。是時冰凍解，劉錦棠令軍士開溝築隄，以防水。金運昌營近棗園，回憑秦渠設卡。壬寅，運昌會錦棠越渠擊之，回收入堡。甲辰，金積回傾巢大

出騎賊趨板橋。步賊決渠水南趨。運昌軍阻於水。錦棠分三路。梟水與之合。黃萬友發開花劈山礮輪轟之。至夜回。始退。乙巳。官軍出渠北。回來犯。伏起敗之。而東南胡堡回決山溝。淹吳忠。斷我赴河西運道。錦棠乃環壘修壩。引注小渠。合流入黃。次日。胡堡回。隔水挑戰。錦棠以開花礮測準擊之。回卽奔。於是渠溝通暢。回復運。甄石築卡於北。環以長隄。冀引馬連水以困我。丁未。錦棠運昌令軍士攜鉏鍤平其卡而還。馬正和圍預望城。周紹濂自同心馳擊走之。遂圍李旺寨。守將李光賓卻之。回走黑城子。李良程躡

擊誅馬正和。餘黨竄下馬關。徐占彪復截擊之。乃走韋州。是時秦省肅清。蔣志章爲陝西巡撫。馬化隆復噉崔三東。犯劉錦棠等。傍壘築隄。北抵黃渠。南接金積里許。其高丈餘。闊三丈。濬深溝。資堵洩。回計大窳。乃傍山水溝築三壘。錦棠等攻破之。分黨犯靈州。錦棠襲之於王銀柵。復大破之。於是馬化隆糧匱。以春耕急。率其子馬耀邦乞撫。錦棠許其耕墾。仍勒繳馬械。方退兵。丁巳。楊世俊擊回於安定。敗績。三月。崔三禹得彥犯清水。入隴州。汧陽分擾寶雞鳳縣。李輝武吳士邁連擊敗之。張福齊敗回於扶風醴泉間。

禹得彥走渭南。水師遏之。遂竄蒲城。趨白水。入宜君。中部
界劉端冕擊之。魚鱗川。還走甘肅靈州。魏光燾截之。拜家
河。乃趨鎮原。固原。黃鼎徐占彪復連敗之。禹得彥還走鹽
茶。崔三亦由秦安至莊浪。隆德閒。馬化隆益失望。劉錦棠
金運昌圍金積。益急。回屢受大創。晝則跽伏。仍潛夜修濠。
我軍益多。掘溝道防之。四月丁酉朔。回決秦渠。馬連渠。西
北風緊。平地水漲數尺。錦棠令各營密排木椿。用茅包土。
置布袋捍禦之。閱兩日。風止水消。回計仍不逞。乃以悍黨
數百渡黃河。劫廣武中衛糧運。黃萬友設伏待之。殲殺殆

盡馬化隆復遣陳林襲陷花馬池大掠而還劉錦棠伏兵
靈州奪其糧畜斬黨魁楊興隆五月傅先宗復涇源甘大
有敗回於合水魏光燾敗回於靈臺回走崇信彭清和截
之半途多散亡是時陳林受鎗傷余彥祿黨眾日減馬化
隆益哀詞乞撫繳騾馬七百匹鎗械五千餘件錦棠未許
六月馬化隆乞耕作靈州回亦乞放渠蔭田錦棠漫應之
設伏於下橋永甯洞俘王洪等二百數十人駢誅之丁酉
進攻馬家兩寨下之值新麥熟錦棠令軍士刈麥並糜粟
悉割之回來爭輒擊走遂築壘蔡家橋決水反灌破回壘

三毀李家橋卡十一自是金積與胡家王洪各堡聲息不通而河西糧路亦斷官軍增壘於東回益窘七月庚午錦棠下張恩堡斬其酋袁希義金運昌襲秦渠北卡克之丁亥雷正縮黃鼎奪還峽口破古靈州城於是秦漢馬連三渠之首皆爲我據八月乙未朔雷正縮黃鼎與回戰古靈州大破之丁酉下丁家堡繞漢渠築壘斷金積援戊戌破回堡二十餘己亥金運昌克何家寨劉錦棠春壽督軍士割麥於胡家堡遂至雷正縮黃鼎營計事辛丑提督黃萬友卒於軍錦棠約雷黃諸軍攻秦壩關丁未破其堡東新

壘。壬子。錦棠與金運昌破東關旁堡。搶入東關。克寨卡二
十三。燒市廬三四千。自是環金積。東南北三面回寨皆平。
錦棠壓東關而壘。俯瞰回巢。回益恟懼。洪樂堡者。馬化隆
祖塋。俗傳風水有異者也。黃鼎雷正綰由老馬堡進攻石
屹塔田家橋。皆下之。丁卯。徐占彪克洪樂外兩寨。回死力
相拒。部將何玉超等陣歿。弁丁傷亡相繼。馬玉隆詣黃鼎
營乞撫。不報。鼎遂薄洪樂而壘。劉錦棠自克東關。議掘濠
築牆以困賊。乃與金運昌分段興工。三日而竣。分兵守之。
九月庚午。雷正綰克丁家三堡。壬申。黃鼎克譚家堡。進攻

馬家堡下之甲戌徐文秀徐占彪移營金積西門丙子克秦壩關及下寨回奔漢伯堡劉錦棠截之悍酋余彥祿中鎗殪其餘黨竄同心李旺黑城各堡周紹濂魏光燾悉殲之黃鼎克漢伯堡及旁堡二金積已合圍官軍從外度之其城周九里其竒高四丈厚三丈東自吳忠至靈州堡寨四百五十餘僅存王洪楊明兩堡西自洪樂至峽口堡寨一百二十餘僅存馬家灘四堡馬家灘環水中不能濟賊官軍亦置弗攻也丙子劉錦棠等下楊明堡次日攻王洪堡不克而還馬化隆乃乞援河州回甲申河州回渡洮河

而東楊世俊要擊於赤沙峴敗之崔三禹得彥自河州出
犯平番提督張萬英彭清勝敗死穆圖善自將擊之回走
鎮番左宗棠慮回由阿拉善繞甯夏河西援金積飭諸軍
嚴備而劉錦棠圍馬家灘未下軍士仰攻多傷死宗棠念
勞師久令陝回劉秉信赴金積招撫老弱降者數百人馬
清壽亦降回中所呼普洱阿渾者也河州回復出巢渡洮
東竄一由大寨渡渭而南一由站灘出好麥川而北十月
丙午楊世俊李耀南出巉口截擊敗之王午回走靜甯總
兵蕭貴謙迎戰失利劉明燈追至清渭回已越秦州南趨

李耀南截之邵家堡楊世俊截之李家川殺傷相當回入
南山左宗棠檄劉明燈等冒雪入山搜捕周開錫遣軍會
之閏十月回掠徽縣兩當李輝武設伏敗之回折而北竄
庚辰至蘇家河辛巳至唐家河官軍緊躡之前臬司陳湜
復截之靜甯合水河回走安國鎮星散不復成列而崔三
禹得彥自鎮番遁柳林河其地愈西於是金積外援絕旦
夕垂破劉錦棠攻馬家灘僅餘兩堡未下金積回乘夜突
圍錦棠預設伏待之回至敗還錦棠增兩壘於東門築礮
臺瞰回巢黃鼎偪紮西門堡中糧罄以草蕪黍根雜牛皮

死屍而食。陝回陳林知勢已去，因劉秉信乞降。堡中老弱婦女日跪濠外，號呼乞命。錦棠飛白左宗棠請進止。十一月辛丑，陳林率黨魁馬化鳳、黑清泉等男婦八千餘人詣黃鼎雷正綰求撫。錦棠令繳馬械，暫給賑糧，候安插。馬化隆見陳林等已降，乃因陳林白錦棠請撤馬家灘圍。錦棠許之，責馬家灘繳馬械。比入堡，則回皆穴地而居，以死馬雜旃絮器物塞缺口，禦鎗礮。其精壯不過數百，然皆身無完膚也。丙午，王洪堡亦降。錦棠並令還故居。馬化隆度就撫無他虞。丁未，親詣錦棠營，伏地請罪，願以身死貸其黨。

錦棠開壁納之。使使馳告黃鼎雷正綰金運昌等謀所以處之者。諸將士怒其反側。欲縛而磔之。錦棠弗許。寘馬化隆於旁幕。派弁守之。令繳馬械。毀堡垣。並招撫王家疇諸回堡。以自續。自陳林就撫。陝回聞風踵至。收降男婦一萬一千有奇。宗棠檄解平涼。候安插。遣陳湜赴金積。與錦棠等籌撫事。奏言西陲之不靖。於今九年。關隴諸回。率視金積爲嚮背。其狡謀兇燄。實異尋常。馬化隆非窮蹙至極。必不輕冒鋒鏑。以求生。今旣隻身來投。並非誘致。則操縱在我。因而誅之。不可謂武。臣前於平涼縣大岔溝邢家溝北

原安插陝回數千給以賑糧其餘荒絕地畝雖多不成片段又平涼係入甘大道居關隴之中北達甯夏南通秦鳳東連涇原邠甯西趨金城湟中形勢最要不宜多居種人惟平涼華亭交界之化平川寬六七里長三十餘里窯洞三百餘兼有破屋土沃泉甘人迹斷絕可安插萬餘丁口近挑已撫回民稍壯者百餘裹糧前往稍加修葺俟各起回民解到卽量地居之給以賑糧種籽牛驢農器督其耕種所有建置經界規制禁令容臣隨時陳奏

旨報可十二月馬化隆復使使招其黨何生洲等還金積

其子馬耀邦繳車輛大銅礮四九節藜礮四威遠礮二十
八劈山礮二十烏鎗一千三十擡鎗二百九十三刀子二
千四百十三洋鎗二百八十金銀銅錢合銀十九萬兩有
奇宗棠度回情難信檄錦棠等徙之他處搜其所匿鎗礮
時天寒冰凝羣回掘堡不速派勇丁助之果於堡內掘得
洋鎗一千三百有奇錦棠以回民驚疑漸釋乃遷王洪堡
回於靈州旁近安插遷馬家灘回於張家園安插

十年正月丁酉遷馬化隆父子及其親屬於廢堡庚子劉
錦棠提訊馬化隆詰以北口貿易交通洋人等事化隆盡

誘其子馬耀邦。耀邦復茹刑不吐。父子俱凌遲處死。於是黃鼎、雷正綰等提化隆弟姪馬成隆、馬中邦等十三人。處以極刑。又誅僞官八十餘人。其客民及被脅甘回三千餘人。解平涼安插。金積男婦一萬二千餘人。解固原安插。毀僞王城東府西府。搜違制諸物悉焚之。馬化隆者。其父曰馬二。與穆三之祖穆大阿渾友善。穆大阿渾傳習新教。臨死。以所服白帽紅衣授之。化隆囑徒眾歸其管束。穆三與其弟穆四、穆五均爲新教。阿渾自京師、天津及黑龍江、吉林之寬城子、山西之包頭、湖北之漢口。均有新教徒黨潛

匿市肆。暗相勾引。化隆自託神靈。妄言禍福。羣回爭信之。比就俘。回黨見之。猶長跪呼之。始起。既誅。回勢遂瓦解。

詔左宗棠加一騎都尉世職。劉錦棠給雲騎尉世職。並與黃鼎雷正綰賞穿黃馬褂。劉松山

賜祭一壇。諸將給獎有差。金順張曜攻王家疃。下之。通貴通昌諸回降於黃鼎。崔三禹得彥等聞金積已下。自涼州西甯還河州。河州回馬占鰲等亦約李德昌赴河州。議撫宗棠方安置陳林等眾於化平川。增設化平通判都司鎮治之。於是平涼以北甯夏以南。回土餘黨搜捕殆盡。而范

銘所部黑頭勇竊踞岷州。傅先宗屢擊破之。潰卒歸誠。二月。河州回竄通渭。分掠秦安清水。張仲春要擊於廖家莊。敗之。楊世俊敗回於任當川。另股竄階州。署知州洪惟善遣軍躡擊。回散亡大半。三月。左宗棠檄劉明燈進駐馬營。監嚮安定。徐文秀駐會甯。修治蘭州道。利轉輸。儲軍火於靜甯。徐圖進取。是時鹽茶固原山內伏莽未淨。宗棠檄魏光燾周紹濂遣兵搜緝。多所斬禽。李輝武復敗回於兩當。楊世俊張仲春敗回於禮縣。李華敗回於通渭。會甯閒。餘孽不復成軍。

朝旨促左宗棠進規河州宗棠以洮河湍急與黃河等自狄道隴西安定進兵皆須造船架橋勢難立辦且收穫期遠前無可因之糧非穩著也時金順張曜圍攻納家寨破之河西悍黨殲焉其降回安置靈州甯夏肅清

詔以金順爲烏里雅蘇台將軍張曜分扼磴口橫城防剿阿拉善竄匪四月洪惟善擊綰匪於階州平之五月周開錫病歿檄陳湜先赴靜甯督糧運時浮橋渡船已成芻糧麤備左宗棠乃檄諸將進規河州劉錦棠扶輓南旋以蕭章開暫統其軍七月庚子左宗棠移駐靜甯陝回分掠西

甯白虎彥陷小南川漢堡據之崔三踞曹家堡禹得彥與
爲犄角。

詔宗棠分兵助剿已而肅州降回潰叛東下甘涼戒嚴。

詔復催宗棠撥勁旅西行乃檄徐占彪率六千人赴肅州。
八月庚申左宗棠移駐安定先是河州回馬占鼇馬尓大
約李德昌至河議撫德昌行至洮河東馬占鼇聞河西用
兵頗疑懼得昌亦疑之撫議遂罷宗棠策洮西三甲集洮
東康家崖據形勝遣徐文秀趨康家崖劉明燈自柳林溝
會之破其旁堡二卡一遂圍康家大堡下之而三甲集爲

河州門戶。西接太子寺大東鄉山高地險。時秋霖河漲。諸軍頓洮東不能渡。宗棠乃令傅先宗楊世俊造浮橋於狄道濟師。先宗世俊分屯洮河西。九月會攻高家集。下之。平其旁壘八。分兵毀新集黨平川吉家山各莊寨。進克紅山馬家集。宗棠增遣王德榜閒渡狄道浮橋。促傅先宗進攻黑山頭。十月甲子。傅先宗自石鼓攻黑山。回緣岡結壘二十餘。山徑峻削。大路皆掘斷。夜四鼓。軍士銜枚閒行。抵回壘。何建威拔幟先登。彭忠國繼之。破其卡三。黎明回。悉銳出援。敖天印已攀蘿緣磴。自山後下擊。傅先宗親陷陣。回

潰逃。黑山延袤數十里。大小回壘皆平。先宗畱四營駐之。
乙丑。自率所部營南山巔。扼三甲集後。丙寅。與王德榜會。
攻三甲集。下之。並破康家窪堡卡十餘。自三甲集之捷。河
回廬集大東鄉。己丑。王德榜等攻甘坪。下之。傅先宗破大
貝坪。劉明燈破鮑家莊。辛未。會攻大東鄉。王德榜傅先宗
劉明燈等軍多所斬禽。回詭詞乞撫。獻良馬二十二匹。諸
將察其詐。弗應也。十一月。回首馬占鼇遁牟尼溝。辛丑。傅
先宗攻紅莊果園。下之。徐文秀燒八戶掌。王德榜連破朱
家坪趙家溝。楊世俊張仲春等攻陳坪馬坪謝坪。皆拔之。

是日諸軍破堡壘五十餘。軍威大振。而董家山綿亙數十里。西接太子寺。北蔽大東鄉。山高堡密。俯瞰我軍。宗棠遣陳湜往勸之。諸將以董家山東峻而西夷。當由西路進。辛亥至乙卯。傅先宗楊世俊徐文秀血戰而前。遂下董家山。直擣太子寺。巨巢。十二月丁巳。傅先宗攻新路坡五卡。克之。馬占鰲自牟尼溝赴太子寺。調循化撒回助守。掘濠自固。壬戌。楊世俊奪其濠。踞北山而壘。次日。陳湜等分攻大紅莊。未克。傅先宗以北山難驟下。乃由南山進攻。丁卯。與回戰南山頂。大破之。斃千餘人。俘悍酋馬哈思。誅之。自是

官軍戰無虛日。傅先宗悉平黨川回壘。太東鄉重險遂失。十一年正月己丑。回傍新路坡築壘三。以爛泥溝四莊一壘爲犄角。庚寅。傅先宗攻三壘未克。辛卯。復約楊世俊攻之。戰良久。傅先宗手執大旗先進。飛礮中右額。殞於陣。壬辰。陳湜派徐文秀赴援。拔其四莊一壘。傅軍新失統將。各營勢沮。糧路頗梗。楊世俊解圍退軍。徐文秀轉戰至黨川。見太子寺東西圍解。慮回乘虛襲董家山。自率親兵助守。回攻傅部中營。哨弁先潰。徐文秀憤極出戰。力竭死之。同時殉者一百四十餘人。左宗棠聞警。急檄王德榜接統。傅

軍沈玉遂接統徐軍德榜等申明紀律士氣復新馬占鼇
誦官軍增壘復進使使詣三甲集行營涕泣乞撫願繳馬
械如前例陳湜遣回目馬壽清覘之還報羣回頂經立誓
永無反覆先後繳馬匹四千有奇鎗矛一萬四千餘件時
西甯回目馬永福等乞降馬桂源以聞馬桂源者因回亂
自署知府者也桂源至蘭州偕道員馮邦棟詣安定謁宗
棠面白撫事二月馬占鼇等各遣子弟赴安定大營獻馬
五十匹宗棠縱令歸巢羣回疑畏盡釋宗棠奏言辦撫之
道以遷徙客回安輯土回爲要河州全境周五六百里回

多漢少。雜以番眾。同治元年變亂以來。陝回多避居其中。自陝境肅清。金積掃盪。固原東西山相繼平定。各屬倡亂之回。亦多寄孥其間。此客回之應徙者也。其本籍漢民。有受河回脅制。甘心役使。名爲隨教者。有讎隙已深。逃至洮岷狄道。充當勇丁。而親屬仍留河境者。宜分別拔出。以杜釁端。其外來漢民。有被陝回裹脅而來者。有被河回裹脅。認爲義子。齒諸奴僕者。宜勒令交出。護送原籍。此漢民之應徙者也。於是宗棠檄安定會甯平涼隆德靜甯各牧令。擇荒地便水草者。安置降回。河州平甘回竄兩當徽縣。窺

陝邊護巡撫譚鍾麟遣李耀武屯鳳縣譚仁芳屯龍寶禦
之是時徐占彪已抵肅州陝回馬長順將赴西甯就撫成
祿襲殺降回數十人長順遂與肅回馬四合成祿藉會攻
肅州以緩出關之行左宗棠含忍既久始具疏論劾

詔優容之仍促其出關三月循化撒納歸誠循化廳者番
回雜處毗連西甯前史所稱吐谷渾地也四月徐占彪進
屯肅州中和橋五月桂錫楨引軍攻肅州東關克其大卡
一關外纏頭入城助守徐占彪與戰城西南設伏敗之遂攻
塔爾灣破其堡四墩卡十九西甯回馬永福率米拉回詣

馮邦棟乞撫。白彥虎禹得彥猶負固拒命。宗棠乃遣何作霖率八營出屯碾伯。龍錫慶兩營繼之。時劉錦棠自湘還隴。乃令道平涼蘭州趨西甯。六月乙卯。徐占彪攻塔爾堡。下之。克小堡二十餘。於是肅州西南墩堡皆平。進屯沙子壩。距肅城才三里。己未。肅回開南門大出。著白衣白巾。傅以黃紙。旣成列。殺一婦一犬於陣前。故爲厭勝之術。徐占彪閉壁不戰。截其半。以开花礮擊之。桂錫楨率馬隊突陣。回奔入城。自是徐占彪無日不戰。肅回哀詞乞撫。占彪憤其狡詐。弗許。庚午。進攻姑樹三堡六墩。下之。甲戌。克四壩。

十一堡均以官軍團勇填紮。戊寅克朱家堡，追殺無算。於是肅城東西南三面賊壘皆盡。時劉錦棠已至碾伯，西甯土客各回，猶懷觀望。錦棠乃榜諭甘回安堵，專討陝回。率董福祥、李雙梁等趨峽口，與禹得彥、崔三大戰破之。進擊白彥虎於高家堡，燒其壘而還。七月丁亥，左宗棠進駐蘭州省城。徐占彪攻朱家堡北三墩，下之。進克劉家堡。陝回王萬有以肅回糧絀，率二百餘騎降。徐占彪納之。八月，徐占彪以城大兵少，不能合圍，乃分一營爲二，繞肅城三面而壘。日以開花礮對城轟擊，垛口多坍。卒弗克。左宗棠奏

調宋慶軍由神木赴甘助勦以張曜軍屯金積堡移譚拔
萃赴西甯陶生林金慶元戴宏勝馬步五營赴肅州適僞
署西甯知府馬桂源出城與陝回謀亂兩日不返漢民習
知其詐乘機閉城拒之請西甯道郭襄之主守事馬桂源
果結禹得彥崔三白彥虎等圍西甯撲李雙梁營劉錦棠
率董福祥等連擊敗之令諸軍依山設伏築礮臺置開花
車輪大礮以待回匿不出九月龍錫慶追回至沙溝被圍
錦棠遣軍赴援破回壘七悉焚之錦棠覘回勢盛抽隊赴
平戎驛造橋渡湟通威遠堡糧路日與回戰湟南北斬禽

無算十月郭襄之使使縋城告糧匱馬桂源亦請退兵就
撫劉錦棠督攻益急昇大礮至北山巔令鄧增測準回壘
發礮子六十餘牆壘皆坍回跳匿溝內錦棠麾軍搜躡之
破北山卡壘殆盡己巳馬本源馬桂源乘夜走東川縱火
焚莊寨由撒拉遁巴燕戎格西甯解巖郭襄之率城內男
婦三萬餘人望塵迎拜歡聲如雷是役錦棠以馬步十八
營分紮八十餘里大小五十餘戰輒立冰雪中厥功偉矣
十一月西甯大通諸回堡皆乞撫繳馬二千數百匹鎗矛
六千餘件陝酋崔三甘酋治興福馬福壽等款營獻良馬

其西甯城回隨馬本源出竄者。劉錦棠遣馬永福往招之。逃歸復業者三千餘人。後至者絡繹於道。十二月大通回馬壽爲馬桂源所誘。殺難民數十人。抗拒官兵。劉錦棠破平之。

十二年正月。劉錦棠已克大通。俘馬壽磔於市。漢民鬻割之。誅其黨馬長忠等一百八十餘人。河東西莊堡踵營納款。請盡繳馬械。獻匪黨。錦棠乃遷城回於河東西。以漢堡難民實之。城外回堡亦量與漢民更易。崔偉禹得彥畢大才望風款附。錦棠挑選精壯立旌善營。惟白彥虎率殘黨。

由永安嚮肅州。馬桂源猶在巴燕戎格。聞大通克竄札巴什城。陳湜沈玉遂張仲春馬占鼇等夤夜疾趨巴城。馬永福率眾迎降。己酉克巴燕戎格。二月庚戌朔。劉明燈敖天印由米拉來會。陳湜寘逆眷於獄。時大雪不止。馬本源猶未知也。劉明燈沈玉遂遣降回至札巴什招諭。馬本源惶懼。始因馬占鼇乞撫。癸丑沈玉遂伏兵東山。縛馬本源。馬桂源下獄。陳湜提其黨。馬主麻海乙什等三十餘人。駢誅之。西甯之役始竣。時陶生林等已抵肅州。金順馬隊亦至。徐占彪屢與回戰。北稍南稍東稍三門。迭獲大捷。奪其禮

拜寺卒以兵少長圍不能遽合。金順奏調張曜赴甘涼助
勦。成祿猶訴軍糧乏。難赴哈密。

詔褫職逮問。以金順接統其軍。己未。白彥虎竄甘州。提督
楊占鼇擊走之。楊世俊躡至撫彝。甲子。回走高臺。大肆焚
掠。肅回馬四遣其黨來逐。白彥虎與之合。踞鎮夷西山寺。
徐占彪聞警。慮後路運道塞。遣陶生林等迎擊。回折而西。
趨肅。回聞官軍分出。乘虛撲壘。徐占彪設伏敗之。戊辰。白
彥虎攻毛目城。金順陶生林馳救。回解圍竄金塔。楊世俊
要擊敗之。三月甲申。白彥虎竄塔爾灣。距肅城三十里。肅

回出城應之。徐占彪與金順、楊世俊合擊敗之。肅回收入城。丁亥，白彥虎乘夜出撲長濠。徐占彪徑襲塔爾灣，破其堡。白彥虎方與官軍戰城外，知巢穴失，急返奔前肅州鎮。王子龍等戰歿。徐占彪合金順馬隊截之，回始敗。於時張曜至鎮，番宋慶亦派蔣東才赴東山，以期迅蕺肅事。而徐占彪圍攻無虛日。四月，回覲長圍已合，日出漢民婦女減食，且欲奪禮拜寺、道塔。爾灣出嘉峪關，徐占彪加掘重濠。回計益窘，議自殺。眷屬出走。五月，宋慶全軍抵肅州，壁城東。官軍聲威益壯。白彥虎遁關外，入安敦玉境。徐占彪約

諸軍築礮臺於城西禮拜寺。置後膛巨礮。六月戊申朔。發一百五十礮。輒石坍卸。而城身未裂。次日復發一百二十礮。傾圮雖多。回輒砌補之。宋慶徐占彪附東關築礮臺。金順亦築礮臺。與徐軍犄角。癸亥。疊發百數十礮。城身坍六七丈。阻濠不得過。濠深三四丈。冬夏不涸。古所謂酒泉也。閏六月壬午。徐占彪揀壯士越濠攻城。徐占彪先登。金宋兩軍蟻附而上。遂克東關。回縱火燒房屋糧料。遁入大城。日出。悍黨與官軍巷戰。徐占彪左腿受鎗傷。乃約金宋兩軍駐東關。自駐濠外養病。左宗棠念肅州勞師久。統將受

創乃議親赴肅州督軍七月癸亥發蘭州八月戊子至肅州駐城南辛未徐占彪楊世俊填濠登城回死拒不得上壬申金順發地雷東北角城坍遊擊張林先登中礮死癸酉徐占彪楊世俊復於西南城掘地道乙亥地雷同發楊世俊率奇捷營先登甫上城飛礮貫腦死之徐占彪仍督將士猛攻陣亡弁裨五十餘人傷士卒五百餘人左宗棠見仰攻損精銳乃議增修濠壘困之時劉錦棠自西甯至甘州候調遣宗棠檄令率師助剿九月乙卯錦棠領湘軍五營至肅州日令降回馬福壽等馳馬城下呼馬四及諸

首告曰死期將至善自爲謀馬四哀懇出城就撫庚申馬
四親詣宗棠大營泥首乞命時金順宋慶徐占彪劉錦棠
均在坐諭令先繳馬械次造土客各回清冊聽候安插其
籍隸甘州者出東門由宋慶點驗籍隸關外沙州者由金
順點驗籍隸西甯河州循化陝西者出南門由劉錦棠徐
占彪點驗各軍預於廢堡分男女安置丁卯核對冊籍拔
出漢民男女一千一百餘人戊辰提逆首馬四卽馬文祿
並黨魁八人磔之礮三發金順宋慶徐占彪劉錦棠分屠
客回一千五百七十三人至夜諸軍入城縱火屠土回五

千四百餘人拔老弱婦女九百餘人肅州平捷聞

詔左宗棠以總督協辦大學士改騎都尉爲一等輕車都尉世職徐占彪賞雲騎尉世職宋慶張曜賞雙眼花翎諸將給獎有差宗棠以甘肅肅清實賴劉松山直擣金積堡劉錦棠繼之馬化隆伏誅從此迎刃而解請以所得一等輕車都尉追賞劉松山有

詔褒獎劉松山已得三等輕車都尉再加賞一等輕車都尉併爲男爵令其嗣子劉肅承襲其後陝甘回或蠢動不爲害故不錄

王定安曰甚矣門戶之爲害也以周孔之道流而爲紫陽
姚江入主出奴至詆爲洪水猛獸抑思其初聖教豈有二
乎西洋奉耶蘇爲基督猶言聖人至今亦分其教爲兩舊教曰
天主新教曰耶蘇諸夷爭教怨毒過於私讎或擁兵攻伐
連數國不得休是豈上天好生之心哉天方在唐時已有
白衣黑衣之分我

朝乾隆閒姦回馬明心自西域歸始詐稱新教其教規約
與老教同惟誦經頭搖肩聳脫鞋送葬此其小異者耳馬
化隆託名新教妄言禍福蓄逆已久卽無陝回之變亦將

詐其徒黨竊地僭號以遂其不軌之謀陝回雖悍化隆視
之特僕隸耳自化隆誅羣回望風瓦解亂遂大定然則金
積堡之功豈不關繫西北全局哉

湘軍記卷十八

武昌范德培校字